

柯
山
集



御製題武英殿聚珍版十韻

有序

校輯永樂大典內之散簡零編並蒐訪天下遺籍不下萬餘種彙爲四庫全書擇人所罕覩有裨世道人心及足資考鏡者剞劂流傳嘉惠來學第種類多則付雕非易董武英殿事金簡以活字法爲請旣不濫費棗梨又不久淹歲月用力省而程功速至簡且捷考昔沈括筆談記宋慶歷中有畢昇爲活版以膠泥燒成而陸深金臺紀聞則云毘陵人初用鉛字視版印尤巧便斯皆活版之權輿顧堃泥體麤鎔鉛質軟

俱不及鋟木之工緻茲刻單字計二十五萬餘雖數百十種之書悉可取給而校讐之精今更有勝於古所云者第活字版之名不雅馴因以聚珍名之而系以詩

稽古搜四庫於今突五車開鑄思壽世積版或充閭張

帖唐院集周文梁代餘同為製活字用以印全書精越

鵝冠體昨歲江南所進之書有鵝冠子即富過鄴架儲活字版第字體不工且多訛謬耳

機圓省雕氏功倍謝鈔胥聯腋事堪例擬泥法似疎毀

銅昔悔彼康熙年間編纂古今圖書集成刻銅字為活版排印歲工貯之武英殿歷年既久銅字或

破竊缺少司事者懼于咎適值乾隆初年京師錢貴遂請毀銅字供鑄從之所得有限而所耗甚多已為非計且使銅字尚存則今之印書刊本此慙予既復羨黎棗不更事半功倍乎深為惜之還教慎魯魚成編示來學嘉惠志符初

乾隆甲午仲夏

柯山集

提要

武英殿聚珍版



臣等謹按柯山集五十卷宋張耒撰耒字文潛楚州淮陰人登進士第元祐中官至起居舍人紹聖中謫監黃州酒稅徽宗召為太常寺卿坐元祐黨復貶房州別駕黃州安置得自便居於陳州主管崇福宮卒事迹具宋史文苑傳蘇軾嘗稱其文汪洋冲澹有一唱三歎之音晚歲詩務平淡效白居易易樂府效張籍故瀛奎律髓載楊萬里之言謂肥

仙詩自然肥仙南宋人稱耒之詞也文獻通考作
柯山集一百卷茲集卷數祇得其半查慎行注蘇
軾詩云嘗見耒詩二首而今本無之考周紫芝太
倉稊米集有書譙郡先生文集後曰余頃得柯山
集十卷於大梁羅仲洪家已而又得張龍閣集三
十卷於內相汪彥章家已而又得張右史集七十
卷於浙西漕臺而先生之製作於是備矣今又得
譙郡先生集一百卷於四川轉運副使南陽井公
之子晦之然後知先生之詩文爲最多當有網羅

之所未盡者余將盡取數集削其重複一其有無
以歸於所謂一百卷以爲先生之全書云云然則
耒之文集在南宋已非一本其多寡亦復相懸此
本卷數與紫芝所記四本皆不合又不知何時何
人撫拾殘剩所編宜其闕佚者頗夥然考胡應麟
筆叢有曰張文潛柯山集一百卷余所得卷僅十
三蓋鈔合類書以刻非其舊也余嘗於臨安僻巷
中見鈔本書一十六帙閱之乃文潛集卷數正同
明旦訪之則夜來鄰火延燒此書倏煨燼矣余大

悵惋彌月云云此本雖不及百卷之完備然較應麟所云十三卷者則多已不啻數倍亦足見未著作之大略矣

柯山集目錄

卷一

賦十四首

卷二

賦十八首

卷三

古樂府歌詞四十首

卷四

古樂府歌詞三十四首



卷五

古樂府歌詞十一首

卷六

五言古詩六十五首

卷七

五言古詩七十一首

卷八

五言古詩七十五首

卷九

五言古詩四十九首

卷十

七言古詩四十七首

卷十一

七言古詩五十六首

卷十二

七言古詩三十七首

卷十三

七言古詩三十三首

卷十四

五言律詩八十一首

卷十五

五言律詩七十一首

卷十六

七言律詩七十七首

卷十七

七言律詩七十五首

卷十八

七言律詩七十五首

卷十九

七言律詩六十四首

七言長律詩四首

卷二十

五言絕句十八首

六言絕句二十一首

七言絕句六十四首

卷二十一

七言絕句九十六首

卷二十二

七言絕句九十九首

卷二十三

七言絕句一百零五首

卷二十四

七言絕句九十九首

卷二十五

七言絕句八十一首

卷二十六

七言絕句一百一十七首

卷二十七

同文唱和詩二十四首

卷二十八

同文唱和詩十四首

卷二十九

同文唱和詩一百零六首

卷三十

同文唱和詩七十七首

卷三十一

表狀十五首

冊文一首

卷三十二

論六首

卷三十三

論四首

卷三十四

論六首

卷三十五

論九首

卷三十六

論十首

卷三十七

論九首

卷三十八

論十四首

卷三十九

議六首

說十七首

卷四十

序十四首

卷四十一

記九首

卷四十二

記十首

卷四十三

傳二首

贊五首

銘二首

偈一首

評二首

卷四十四

題跋十八首

卷四十五

題跋十四首

卷四十六

書簡十三首

卷四十七

啟十三首

疏二首

卷四十八

祝文二十首

祭文八首

卷四十九

墓誌銘五首

卷五十

墓誌銘八首

臣徐立綱恭校

柯山集卷一

宋

張

秉

撰



賦

大禮慶成賦

惟宋六世皇帝踐阼之七年所以和同天人綏靜中外
垂鴻龔裕增高累厚以對於神祇祖考者固已蒙被充
塞光融翕赫六合一意四海一口無得而言矣粵以壬
申之仲冬將有事于南郊乃詔列位恪職賦事而有司
建言惟我國家因時施禮郊丘之位天地咸在牲幣並

薦禮樂合舉而古者乃以陰陽之至卽南北之郊別位殊時薦獻異數有司其何從于是天子惕然深思祇畏敬慎曰茲大事我其敢專羣公卿士典禮之官竭思和會以訂不易于是議者曰先王齋明以享帝而帝之享否雖聖人末由知之惟受福者其享之占恭惟國家合祭天地于茲六世矣惟我太祖躬膺駿命以遏亂略堂皇二儀拓落八極以定萬世之業太宗威定宇內震蕩大漠以一丸有定天下于一尊真宗熙洽富盛符瑞委積南牧之旅不戰請命臧加北荒奏功岱宗仁宗席安

據厚不動指顧孽獠猶羌含毒內向吏士未頓藏竄屈伏終始太平垂五十年英宗入纂百姓與能神考有爲六服承德此可謂受天地之福矣然則神祇之安吾享也其久哉于是天子乃翳青雲之屋乘雕玉之輿應龍受轡招搖翼輔建虹電之修竿兮颺彗星之飛旂太乙執節以先驅兮二十八星拱手布武經營而周游貔貅六師雷霆萬乘初海沸而雲涌忽山峙而川靜蓋天子粹然玉温健然天運望宮門而動色顧執策而命進惟烜赫之靈源兮實鼻祖于神明覽光德而來降兮館玉

宇之嚴清張威英之廣樂備千籥之盛舞景光交徹鸞
鶴來下神嬉靈豫醉爵飽俎翼翼清廟觀德之宮七聖
在天時降于宗世有哲孫豈弟無彊惠我文人案此下脫四字
瞻祖祏而念功兮顧禰室而感親聖孝油然而發申兮在
位望而含辛霽暘告旦祥飈掠壁從我髦士來祇精禱
御史肅吏司馬飭兵既透透遲遲雲流而日行兮又洵
洵業業海運而天聲靈旂洪順翕赫欬霍兮攫拏龍虎
而亂鯤鵬雄鷲瞻威而震伏兮柔良化禮而肅清弛天
威戢天戈兮固已熄威蚩尤而折欃槍執飛廉圍商羊

屬之有司兮義和磨刮披拂盡獻其光明蓋傾都空間
翹首跂足俯窺履綦傍覘佩玉者忽焉不知手之加額
口之成祝也于是背都城望帷宮郊坰坦其迤邐兮場
圃旣寒而畢功頽青雲以連屬燦虹霓之經緯紫微下
屬于兩觀勾陳錯施于萬雉扶傾之神仰立而拱翔德
之龍下視而曳疑神變之欵成兮涌九地而出峙連廡
千柱廣殿萬杙飛薨鬪桷洞牖屹壁酸股之隅眩目之
極唐洛執算而莫計班倕操斤而自惑者類非資材于
斲墁而皆機杼之紡績也一室之用足以溫一家一宮

之費何啻衣一國驚霆之蹕旣震洶壑之聲咸寂敞齋
寢之靜深兮何清虛而邃密天子方端儼而虛一多儀
未舉精意已塞甲夜始晦巖鼓載作飛斂走伏神讐鬼
愕望舒騰精以燭宵兮元冥收威而布德靈鼉五震軫
車將中天子乃披袞執玉兮齋明莊肅之誠動于進趨
表于形容千燎具揚萬炬畢融上揜熒惑旁爍燭龍近
爲朝暘遠爲融風赫赫曦曦煌煌輝輝列次之士野屯
之師歸如酌醇醪而御兼衣黃流汪洋璧玉照徹祥祲
衡布協氣下浹音爲樂和形爲人悅白質之獸簫聲之

鳥紛披雜沓應奏而舞節陟降旣周燎烟始升奔星走
虹奉璧薦牲豐隆奔馳而仰驚兮祝融焜煌而上征開
闡闔兮闢清都后帝燕兮百神愉圓錫蓋兮方獻輿岳
輪固兮溟効濡于是禮備樂成整車而旋萬類環極端
門闢天賞出千庾恩流百川北包大壤南盡島蠻西越
流沙東窮海壖令未脫口雷運風傳野無窮人獄無宿
愆破械解縲負帛囊淺車反其舍士復其伍効技呈才
千鐘萬鼓天子舉酒以屬羣公咸曰休哉天子之功系
曰於穆聖王建皇極兮嚴恭精禋帝來格兮柔祗並位

儼牲璧兮文祖在坐臨有赫兮於惟祖宗有常則兮諱
兵畏刑後貨食兮政有損益茲不易兮帝則鑒之馘穀
錫兮兢兢業業日一日兮三載一祀年萬億兮

游東湖賦

紛不知吾之所如兮獨漫漫而若狂乘醉飽之餘力兮
遂陟巘而緣岡惟大冬之栗烈兮莽川澤之茫茫農功
休乎場圃兮平陸散夫牛羊憫大木之百圍兮慘赤立
而無裳鸛鶴羣鳴而下上兮雜篁竹之青黃忽平陸之
既窮兮漸積水之汪洋曰是爲齊安之東湖兮右派合

乎濤江荒灣寂寥而葭葦兮懸疏簷于夕陽爲舉網而
無獲兮嘉魚逝而洋洋弔村落之柴荆兮哀淮夷之陋
荒呼徒侶而還歸兮陰風振而塵颺畏星昴之將中兮
冒玄夜之飛霜顧謂童子汝其賦詩焉有小子裒然致
詞歌曰歲窮木落兮大澤空雁宵征兮天北風曷不飲
酒兮御元冬歸來歸來兮樂未終余曰汝歌置之乃歌
曰臨山川兮懷故鄉歲窮陰兮晝不暘升高堂兮潔余
樽耿余思兮古之人

問雙棠賦

有序

雙棠者予寓陳僧舍堂下手植兩海棠也始余以丙子秋寓居宛邱南門靈通禪刹之西堂是歲季冬手植兩海棠于堂下至丁丑之春時澤屢至棠茂悅也仲春且華矣余約常所與飲者且致美酒將一醉于樹間是月六日予被謫書治行之黃州俗事紛然余亦遷居因不復省花到黃且周歲矣寺僧書來言花自如也余因思茲棠之所植去余寢無十步欲與鄰里親戚一飲而樂之宜可必得無難也然垂至而失之事

之不可知如此今去棠且千里又身在罪籍其行止未能自期其于棠未遽得見也然均于不可知則亦安知此花不忽然在吾目前乎因賦問棠以自廣云

寓舍之壤既膏且腴手植兩棠于堂之隅風來自東冰雪融液興視吾棠旣葩而澤乃沾我酒又命我人期一醉于樹間聊快酬于芳春夾鐘之初謫書在門陸走千里止于江濱天星一周穆然舊春想見吾棠粲然含姿俯睨舊堂今居者誰婉如怨而有待淡無言其若思嗟

乎始種自我其享將獲盈我旨酒會我賓客一酌未舉
俛仰而失事至而驚其初孰測惟得與失相尋無極則
亦安知夫此棠不忽然一日復在余側也且夫棠得其
居愈久愈敷無有斧斤斲傷之虞我行世間浮雲飛蓬
惟所使之何有南東夫以不移俟彼靡常久近衡從其
志必償歌以託之用著不忘

柯山賦

入東門而右回者原迤靡以相屬拔磅礴以陸起兮是
爲柯山之麓其上蕭森而晦靄兮冠萬竿之修竹下礪

确而堅密兮拱高林與喬木散雞犬于危陬兮雜茅茨
與夏屋通樵牧之蹊逕兮路縱橫而斷續撮土石列暗
竇谷虛鳴鳥上下伏獸號呼俯江流之蕩潏招列山之
蟠紆林巒作態而蔽虧兮風雲効技而卷舒固可以開
闔陰陽于一氣寅饒日月于天衢爰有窮人癯然無歸
曠四海無所投其足兮后帝命我于山之隈庇茅蓬之
數椽兮撫枵腹而常飢時醉飽而自得兮亦杖履而遨
嬉逾山而東席門草藩爰有君子于茲考槃自種自食
鄰里莫干圖書滿家兒稚飢寒相見輒喜有時不冠寄

萬事于一笑兮不知食糲而衣單吾不加物以一毫兮
亦莫受人之燠暄悟紛華之多虞兮幸寂寞之至安飲
我薄酒懽有餘啜我豆羹甘而腴隱几而休讀我書乃
曳杖歌曰升柯之巔明遠眺兮築柯之庵可以老兮終
古不忒天之道兮于于而行無喪吾寶兮

卯飲賦

張子晨起落然四壁千林霜曉四顧寒寂先生惘然而
不自得顧視壁間若有物焉短脰魁腹兮長喙旁啄而
稚髻上直也雖未知其何祥而津津然有喜色矣于是

童子趨而進曰是有客曰麴生者願奉先生于頃刻先
生欣然三揖而進之蓋其氣盎盎冽而浮兮其聲瀏瀏
和而幽兮其質醇醇毅以柔兮先生曰甚矣予之不敏
也今日乃知從子之遊于是體之栗然寒者溫心之鬱
然結者散已大忘于寒暑尙何有于夜旦揖麴生而告
之曰吾將旦旦與君周旋旣導君以良辰又餞君以芳
鮮而可乎麴生對曰斥子之泉吾泉出兮楊吾之腹君
腹實兮陋彼昏之獻嘲何啻富子于一日

鳴雞賦

先生間居學道昧旦而興家畜一雞司晨而鳴畜之既老語默有程意氣武毅被服鮮明峩峩朱冠丹頸元膺蒼距矯攫秀尾翹騰奉職有恪徐步我庭啄粟飲水孔肅靡爭山川蒼蒼風霰宵凝黯幽窗之沈沈悅余夢之初驚萬里一寂鐘鼓無聲聞振衣之膈膊忽孤奏而冷泠委更籌之離亂和城角之淒清應雲外之鳴鴻弔山巔之落星歌三終而復寂夜五分而既更萬戶皆作車運馬行先生杖履而出觀大明之東生

暑雨賦

提九山于空虛忽並擊而俱裂壅百川于河漢乃防隕而一決哀下生之微生何足供夫推折方朱鳥之宵中歲仲夏兮大熱雖悵炎之一快俄鬱蒸之莫洩叢百指于環堵顧杖履之安設委熏風于九旬淫疾苦于百節付六鑿于渾沌獨天游而神悅忽翛然而輕舉固已窺寒門而蹈冰雪攬北斗而酌天酒覲上帝于元闕聊逍遙兮窮年俯故居兮螿堙

盧藩賦

張子被謫客居齊安陋屋數椽織蘆爲藩疎弱陋拙不

能苟完晝風雨之不禦夜穿窬之易于上雞栖之蕭瑟
下狗竇之空寬先生家貧一裘度寒曾肱篋之不郵何
藩籬之足言鼓鐘于宮聲出于垣中空然而無有徒望
意而輒還故吾守此敗蘆其固比夫河山若夫朝暘不
出微霰旣零聲如跳珠淅淅可聽及夫衡門暮掩烏雀
就栖挂荒山之落景絡哀蔓之離離其下榛草樵蘇往
來螻蚓出入羊牛覬窺先生蹙然杖藜過之瞻顧四隅
憫然歌之曰公宮侯第兼瓦連甍紫垣玉府十仞塗青
何嘗知淮夷之陋俗窮年卒歲乎柴荆也哉

燔薪賦

歲暮苦寒烈風不休先生家貧衣無重裘讀書夜闌爐
炭已灰先生瑟縮凄然不怡顧謂童子與薪偕來童子
抱薪而來曰是薪也陳之壁間自春徂冬風日所熯埃
塵所蒙固藩液之乾竭乃外槁中而空惟利簇燔無所
獻功與火相得赫然大烘堅枿勁節久而後燃旣羣枯
而効技又熒熒而不烟于是先生欣然環坐皆喜或裸
股赤足或引手張臂窮谷蕭條薪炭如土蓋取之而不
竭顧此樂之甚富又何必琴材修直獸材攫搏漢壁之

椒效煖魏宮之金辟寒誰知空山寒夜之叟敢傲溫于

狐貉之前

原注今供上方炭率斷成琴材胡桃文鶉鴿色

杞菊賦 有序

予到官之明年以事之東海道漣水漣水令盛
僑以蘇子瞻先生後杞菊賦示予予不達世事
自初得官即不欲仕而親老矣家苦貧冀斗升
之粟以紓其朝夕之急然到官歲餘困于往來
奔走之費而家之窘迫益甚向日悲愁歎嗟自
以為無聊既讀後杞菊賦而後洞然如先生者

猶如是則予而後可以無歎也

有蓬四垣張子居官童子晨謁有駒在門張子迎客平
生故人予致其勤餽客以殮擷露菊之清英翦霜杞之
芳根芬敷滿前無有馨羶客愠而作謂余曷然張子始
歎終笑以言陋雖爾棄分則余安子聞之乎膠西先生
為世達者文章行義徧滿天下出守膠西曾是不飽先
生不愠賦以自笑先生哲人太守尊官食若不厭况於
余焉不稱是懼敢謀其他請卒予說子無我嗟冥冥之
中實有神物主司下人不問毫髮夫德不稱享者殃勞

不稱費者罰予身甚微余事甚賤聊逍遙于枯槁庶自
遠于人患客謝而食如膏如飴茲山林之所樂予與爾
其安之

涉淮賦

涉清淮之浩蕩兮聊以豁吾之幽憂轉峽石而下泛兮
觀波濤之複流何佛廟之巍峩兮隱于兩山之幽眺東
崖之飛閣兮納萬里之清秋昔淮人之倔強兮恃江左
而不賓方中原之多故兮遂竊帝而稱鄰遭世宗之勃
興兮乘累聖之威神盡疾馳而奉命兮戈一揮而遂臣

始盤桓于壽春兮蓋嘗挫而益振驅貔虎于順流兮臨
長江之廣津馳千里之玉帛兮擁百萬之精軍計其一
時之氣兮固叱咤而風雲嗟百年之幾時兮山川儼其
如新忽人事之幾變兮撫墟廟而湮淪訪遺事于樵夫
野人之談說指餘迹于荒城故壘之荆榛徒見夫雲悠
悠而朝出水漠漠而東流飛沙驅于晴渚聽夜舫于行
舟彼時豪盛此日廢昔人功業今人愁嗟夫旦之心暮
不可求前之迹後不可再胡爲寂寂之前古乃以興亡
而感慨雖物至盛者其存也宜久勢極大者其亡也可

驚方登臨而遠想豈獨予兮忘情

後涉淮賦

有序

甲寅之秋自正陽涉淮作涉淮賦既至泗之臨淮邑之東南皆淮也朝游夕濟凡淮之驚畏風濤之變無不歷之矣今秋又以事之東海至漣水入漣河舟人告予曰淮水自是入海矣予生二十有二年吳楚秦蜀之國來往殆徧竊悲其跡之不常作後涉淮賦以自廣云

浩淮流之湯湯兮蕩余舟以沿泗嗟我居之不常兮未

暮歲而再來始進棹于正陽兮睨下蔡之窮城界陳許之北壤兮望荆塗之兩山緬川原之迴複兮思禹功而慨然爰係舟于徐邑兮浸淮隅之兩壩駕長帆于朝風兮凌星河于夜湍豈所覽之未周兮恨未窮其本源忽行役而南去兮稅吾楫于清漣指溟渤于西北兮曰此淮流之所還彼百川之歸海兮吾固知其必然惟循源而極末兮哀予迹之未安當天時之晚秋兮風露慘其既至山峭峭而瘦出兮水紺潔而無滓曳孤蓬而忽驚兮出游鱸于短葦白鷺飛而下來兮翩如避世之君子

酒芳香而盈盈兮吾陶陶而日醉方頽然而遺形兮孰
卑高而賤貴彼貴者樂其府兮富者懷其資無二者之
累予兮何羈游之足悲窮天下之奇觀兮極覆載之所
藏膏吾車而勿反兮畢吾世而徜徉

雨望賦

談海天之蒼茫觀驟雨之霽霽飄風擊而雲奔曠萬里
而一蔽卒然如百萬之卒赴敵驟戰兮車旗崩騰而矢
石亂至也已而餘飄既定盛怒已泄雲逐逐而散歸縱
橫委乎天末又如戰勝之兵整旗就隊徐驅而回歸兮

杳然惟見夫川平而野濶夫雲霞風月之容雷雨電雹
之變非巧力所能爲蓋人間之絕觀必也登雄樓傑閣
之崢嶸憑高山巨海之空曠徹除耳目之障蔽而後能
窮極變化之奇狀嗟我居之卑湫兮束觀聽于尋丈顧
所欲之莫得兮徒臨風而惆悵

暮秋賦

嗟予志之莫就兮哀天時之不予謀歲冉冉以將暮兮
無以蕩吾之幽憂昔吾之既有知兮獨信道而不顧鞭
吾駒之不戒兮眇一世而獨鶩儼章甫以自好兮安知

越人之異容恃所持之不欺兮謂彼此之情同夫何事
物之多故兮因少愚而老智彼善惡豈有常兮固繫夫
一世之賤貴或指礫以爲玉兮人皆知其不然衆旣訛
而莫返兮事隨信而名遷僞言實于衆舌兮至寶賤于
獨知正無助者必危兮惡乘朋而或濟決大河而東奔
兮挽予舟而上泝嗟爾楫之幾何兮蛟龍鬱其方怒外
旣揆而內度兮考舊好之同異韜九襲以深藏兮固可
死而不可試卷杜蘅之幽佩兮苞芳蘭之翠衣畏久畜
之不揚兮時竊陳以爲戲怨所資之不售兮非達人之

宏規彼廢興之有命兮何憂樂之足係奏吾琴之憤怨
兮酌吾酒之列清攬芳桂與秋菊兮聊以駐吾之頽齡
吾又將之夫深山兮遂絕世而遠去身九浴而後衣兮
齒三滌而後咀納冰霜于胸中兮蕩焦膈之宿汚求仙
人之奇術兮與彭咸乎爲伍彼君子之蹈常兮曷急世
之有知聊逍遙以卒歲兮樂命天而不疑

臣吳廷選恭校

柯山集卷二

賦

宋

張

耒

撰

超然臺賦

原注蘇子瞻守密作臺于圃名以超然命諸公賦之予在東海子瞻令貢父來

命有序

或有疑于超然曰古之所謂至樂者安能自名其所以然耶今夫鳥之能飛獸之能馳與夫人之耳目手足視聽動作自外而觀之者豈不以爲大樂乎然鳥獸與人未嘗自以爲樂也古之

有道者其樂亦然又安能自名其所以然耶彼
方自以爲超然而樂之則是其心未免夫有素
也客應之曰吾豈以子之言非耶吾方有所較
而後知超然者之賢也予視世之賤丈夫方奔
走勞役守塵壤握垢穢嗜之而不知厭而超然
者方遠引絕去芥視萬物視世之所樂不動其
心則可不謂賢耶今夫世之富人日玩其金玉
而樂之是未能富也忘其所有而安之是真能
富矣夫惟有之是以貴其能忘之使其無有則

將何所忘耶子以爲將忘超然爲真超然則其
初必有樂乎超然而後忘可能也子以爲樂夫
世之樂者乎然則子亦安知夫名超然者果非
能至樂者也賦曰

登高臺之岌峩兮曠四顧而無窮環羣山于左右兮瞰
大海于其東棄塵壤之誼卑兮揖天半之清風身飄颻
而欲舉兮招飛鵠與翔鴻莽丘原之茫茫兮弔韓侯之
武功提千乘之富強兮憑百勝而稱雄忽千年而何有
分哀墟廟之榛蓬有物必歸于盡兮吾知此臺之何恃

惟廢興之相召兮要以必毀而後止彼變化之無窮兮
嗟其偶存之幾何聊徼樂于吾世兮又安知夫其他或
有疑夫超然者兮豈其知道而未純曰彼天下之至樂
兮又安能自名其所以然惟樂而不知所以樂兮此其
所以爲樂之全彼超然而獨得兮是猶存物我于其間
客有復之者曰子知至樂之無名兮是未知世之所可
惡世方奔走于物外兮蓋或至死而不顧眇如醯雞之
舞變兮又似乎青蠅之集汗衆皆旁視而笑兮彼獨守
而不能去較此樂于超然兮謂孰賢而孰愚何善惡之

足較兮固天淵之異區道不可以直至兮終冥合乎自
然子又安知夫名超然兮果不能造至樂之淵乎

鳴蛙賦

有序

予寓山陽學舍夏大雨屋四隅成塘聚蛙以千
計鳴聲不絕夜爲不能寐客有獻予以殺蛙之
術曰投予藥一丸蛙無遺類矣童子將用之予
曰不可復爲賦示之

夏雨初止積潦過尺有蛙百千更跳互出辛此新霽夜
月清溢我勞其休歸偃于室于時蛙鳴若嘯若啼若訴

若歌若懼而悲若喜而語若怒而詬若噦而嘔若咽而
嗽瘖者之呼吃者之鬪或急或緩或清或濁若羌絲野
鼓雜亂無節兮又似夫蠻歌獠語詭怪之迭作也爾其
困于泥潦失其所處而悲又若夫旱熯既久得其所處
而樂也爰有童子持燭來謁曰蛙羣夜鳴君寢其聒考
之周官洒灰驅蛤君其教之予得盡殺予語童子爾無
是酷爾樂而歌而哀則哭哭則悲嗟樂有聲曲聚語羣
爭引吭而呼一日之間不寧須臾蛙不汝嫌汝奚蛙誅
萬物一府誰好孰惡爾奚自私已厚蛙薄參通彼已樂

我自然弭爾怒心置燭而眠夜半張子援枕而吁顧謂
童子記吾言歟前言未究請卒吾說物各有時夫誰敢
遏爾觀夫春露初霽朝華始敷文羽清喙飛鳴自如若
奏琴箏而和笙竽清耳悅心聽者爲娛及夫陽春旣徂
炎火將極惡草蕃遮淫潦瀦積蛙于此時生養蕃息跳
梁號呼意氣橫逸子如之何時不可逆時乎時乎美惡
皆然當其盛時誰得而遷及其雪霜旣降木實草衰飛
蠅聚蚊孽無所施于是此蛙歛吻收足尪然土中一聲
不出黨散巢拔不可終日盛不可常興衰迭乘子姑忍

之奚以殺爲哉

齋居賦

仲夏之月陰氣始至陽旣盛而初剝陰浸亨而用事水
伏畏涸火燎方熾其于人也心實過炎而腎受其弊惟
人之生受命在子推卦曰坎于行爲水微陽所潛元氣
之始故火甚烈則正氣或因而衰則水受害者君子之
所深畏于是屏事燕息滌慮齋居旣靜事以無刑又遠
眺而高居却紛華而弗陳與淡泊乎爲徒絕嗜寧慾愛
精嗇神聲色不御滋味弗親冲然與和俱遊湛兮以道

含真故能體強志寧愉樂壽考遠去疾癘保此難老嗚
呼苟能推此以盡道攷此以察物則豈惟齋戒以御時
宜其顛沛而勿失且夫冰炭相乘利害交至隕真盜和
豈獨陰沴道心惟微易失難常困于侵陵有如微陽則
洗心滌慮以却外垢虛中保和以全天君故能涉至變
而不濡更萬變而常存蓋將窮年以齋居豈特養生而
善身乎

蜘蛛賦

魚游假淵鳥棲求木而我所宅獨取諸腹巢于牆屋人

不予取朝蠅暮蚊食人所惡彼殘物以養而無益于世
雖名人兮斯蟲是愧

得友賦

原注答
子邕

予趨世之僻迂獨予子而無朋信所樂以直前嘗媒仇
而賈憎惟物態之多艱撫危心而自驚甘默默以退藏
包薄技而無成何吾迹之不常旅成周之故京眷吾遊
之悠遠耿誰語兮吾情惟夫子之好修昔固聞乎德聲
獨顧我而忘勤握未煖而心傾發鍵鑰而不疑奏金石
之鏗鏗內端肅而粹溫外炳煥而清明嗟我鄙而子奇

謂欲合而莫能援古義而見交愧此意之何勝既兩盡
而莫疑亦交規而共評驅昔憊之無餘撫新樂而生矜
豈目前之懽愉實未得乎平生惟清洛之名都窺園沼
之清澄語寒堂之夜燭醉春圃之朝英徵逸士千古初
亦窮微而造精投明珠之的歷報美璧之煌熒惟此樂
之無窮使我愛日而兢兢雖所歷之萬殊願勿疾兮茲
誠

懷知賦

嗟予生之苦艱涉世故而多違空羣嘲而衆侮獨予子

其從誰嗟若人之好修外洵直而中奇挈予手而指津
謂予車之不迷遵常度以夷行正六轡而安馳嗟終日
而無禽曰固然而曷疑惟言動之合符若方圓于矩規
振高言于皇極流餘麗于奇辭沃道德以相酬心厭滿
而忘饑愛日月而畏別卒悠遠而多懷跂予望兮莫瞻
將駕言其從之何出門之多艱頓我馬以嗟咨山叢叢
而造天車欲進而畏摧臨江湖以浮舟蛟龍鬱其揚鬣
路幽迥而莫通心鬱塞而增悲贈瓊瑤以致情恐所託
之吾欺惟至技之難投或舉世而莫知倘一遇而見明

蓋至樂之無儷彼取舍之迷方或骨肉而相遺苟我心
之不察雖親愛而何恃故烈士之報知己或殺身而不
辭豈以生而易名誠內激而忘私風蕭蕭以戒秋蟬嘒
嘒而鳴悲白露團兮夕涼庭木颯其先衰羈我馬于東
周蓋三歲其于茲老鬢鬢而來逼心鬱鬱而不夷顧所
樂之莫從託宵寐兮庶幾酌尊酒以忘憂寫我心兮陳
詩

遣幽賦

居子子以無與兮出莫知其所之獨端居以終日兮耿

默默以長思古之人不可得而見兮存者滅畧之遺辭
顧一世之異情兮予誰者其從之惟我生之拙迂兮嗟
所慕之名奇挹廉清之遺風兮曰吾其進難而退易百
驅不加于跬步兮却轡疾返而莫追踐斯言之不欺兮
庶吾心之無愧日月忽其遷流兮老忽忽而既來惟所
蹈之日迷兮撫前心而自非欲改故而圖新兮從靈龜
而問疑兆改橫而上從兮史爲予而告辭橫爲室而善
處兮上從直達其無巘豈外拘而中泰兮或者既塞而
將遂保爾守而無變兮神明于汝其遺之相利害而爲

術兮彼鄉人其猶恥美靈龜之告繇兮得我心之所止
彼蹢躅其焉往聊安安以自恃歲冉冉以將老兮草木
颯其變衰玄蟬號乎高柳兮溢菡萏于清池宵蟲悲鳴
以相語兮朔雨振迅而南窺嗟吾客于東周兮周天星
之三移寫我憂以命駕兮憑高明以遠視覽平田以芒
泱兮瞰清格之東駛山重複而南積兮萬嶺轟轟以鱗
次微雲灑霽以忽布兮孤翼滅沒而高逝熊耳高高而
西峙兮女儿奮湧而南危束平川于兩間兮散佃漁于
平地雞犬密其相聞兮溝塍布而如碁牛羊閔以就牧

兮烏鳥號呼以羣嬉登故國之餘墟兮望遺宮之頽基
傷者來世而無窮兮樂者昔人其既止惟達觀其超忽
兮等廢興于一視考物變以自樂兮遣餘情于酒醴大
人無卽而非樂兮淺夫係物以自治彼方窘我以局促
兮我則顧步而廣肆制憂樂于在彼兮夫何貴乎明智
忘吾憂以洋洋兮將以語夫君子

哀伯牙賦

伯牙鼓琴後世無知我哀伯牙似智而愚天地之間四
方萬里知爾琴者一人而已鍾子既死其一又亡欲彈

無聽泣涕浪浪已奏已聞欲誥不可偪塞滿懷無所傾
寫抑揚黃華巷歌里曲入邑娛邑入國悅國回視伯牙
面有矜色夫操至伎者必不和衆人之耳而媚衆耳者
又善工之深恥違衆者常子子其無與而冒恥者乃身
安而獲利則亦安知夫至藝之非禍而庸工之非祉也
嗟夫將爲至巧者必無顧于終身之無與則至巧之于
人乃不祥之上器操不祥之器終身而不知則伯牙者
乃後世之深戒

石菖蒲賦

有序

歲十月冰霜大寒吾庭之植物無不悴者爰有
 瓦缶貯水斗許間以小石有草鬱然俯窺其根
 與石相結絡其生意暢遂顏色茂好若夏雨解
 籜之竹春田時澤之苗問其名曰是為石菖蒲
 也攷諸本草則所謂養性上藥仙聖之已試者
 也因賦之云

歲寒風霜水落石潔大木百圍僵仆摧折有草于此寸
 根九節曾是莫傷葦然茂悅若處廣深隱奧密而不知
 戶牖之外平地尺雪也將糜而餌之私其益于我躬則

不幾于奪也曷若致之吾前儀之以自修兮庶乎比德
 之琚玦也

病暑賦

皇昌運之元祀兮予出守乎清潁之區背國門而南驚
 兮弭楫乎太昊之墟方炎夏之隆赫兮閔時澤之不濡
 魃乘時而行虐兮盜威烈乎賜烏駕畢方而驟熒惑兮
 回祿為其前驅燼所及于一燎兮何有瓦石與璠璣豐
 隆致其微陰兮飛廉蕩覆而無餘野瞳瞳而揚塵兮何
 蕭艾之芬敷應龍矯首于下澤兮僅自免于槁枯烏呀

味而忘飛兮獸逃穴而深居嗟人胡獨不能兮無乃欲
息而被驅昔蘄山之秋筠兮因冰卷而玉舒効功能于
么麼兮曾何足以寧吾軀飽風而爲蝟兮又欲泳水而
爲魚出寒泉于深井兮竭筋力于轆轤不計腹之所受
兮尚問山窮麩麥之有無亂曰陰陽循環靡窮極兮時
至而變有常則兮融液金鐵爍山石兮謹視其報在朔
易兮元陰大冬冰雪積兮無畏其機備其極兮補完裘
褐戒紡績兮保我歲寒以終吉兮

喜晴賦

積雨初止萬境聲乾星漢昭回夜客尚寒晨起載欣朝
暉在門起往從之清明肅然蚋安其穴蝸不遺涎還開
通于滯濕失沮洳之墊昏列缺弭鞭豐隆偃麾羲和緩
轡而安行背扶桑而經天街顧大田之多荒乃愀然而
興哀聊雷霆之一嬉遽下土而罹災詔龍螭使伏蟠息
憤怒之喧隕曰予悔禍于斯人勞苦雨師以一杯惠我
農師豈不休哉

南山賦

原注寄
張嘉甫

南山巖巖兮其下有人佩玉而握珠刻意魯叟之古經

不習世儒之臆書我頃見之于宛丘貌秀皙而眉疎別
去忽兮幾時面蒼瘠而垂鬚愛德器之老成資巧琢于
璠璣問所與之爲誰亦黃槁之仙癯禁八馬之超鶩同
芻豆于羣鴛時慷慨而長鳴恥賤工之附輿我行世之
多艱三年困兮江湖幸天恩之放還過都梁兮躊躇奉
兩月之周旋越長江之馳驅屢飲我于山間出翩躚之
兩姝舟師告予以當行具檣楫于斯須歲方春而寒驕
犯冰雪于野墟雲漫漫兮垂天風飄飄兮切膚穉髮翳
于宿莽妍柳秀于羣枯泛羽觴之清冷聊覽物以爲娛
思佳人兮天末望莫見兮愁予

秋風賦

張子夕坐于堂之南軒有風颯然來自西方感乎人心
異于尋常初披偃乎草木亦泛動乎軒窓張子曰是風
也所以成歲而佐陽者乎時也朱火就謝七月始涼旣
導迎于肅殺又介紹于雪霜其中人也萬竅洒然汗澤
爲乾纖絺魯縞不勝其單其加物也未敗其形先傷其
情未隕其生先奪其英使之嗒然萎者見于顏色黎然
槁者動于聲鳴吾嘗中夜而聽之浙瀝颼颼羣動百蟲

怨泣悲吟動人忡忡者秋之聲旦起而望之清明高潔者秋之容于是庶草効實九穀獻功旣獮于野又嘗于宗感天時之不留念歲律之將窮張子曰吾何爲乎戒裘褐以備嚴冬而已

南征賦

原注贈張嘉甫

予文窮而莫諱兮顧四方其何適毋寧征于江右兮毛土膏其可食抱朝暮之勝氣兮西山吾以爲宅風予帆于晝日兮予朝發于赤壁標玉壘之下流兮逝蓬飛于一息迅沮漳而橫入兮滙揚瀾于左蠡痺吾目而無恨

兮濤猛獸以噬獰霽光風于木末兮俟餘波猶未肯平

迷失道而問津兮

案此下脫三字

御于朱明就漁父而陳詞兮

予非湘纍之獨醒父告予以不洽兮南樵舍而自成破隴畝而溢流兮石險很而當道豈舟人之肅洽兮艇觸撥而欲倒繫予車于桑本兮予猶可以徒行夷予竈使不得炊兮予猶可以乞隣曰厚土之瀰漫兮予騷騷無以爲家雖斯人之可懷兮烏猶長鳴以歎嗟黃蒲田之所播植兮歲有秋而登場旣狼戾而竭隣兮已獨賦乎廩倉饌上方之玉盤兮上日飽斯人之德歲協洽而斲

兮味柔嘉予未得食染予指于鼎兮豈不同此臭味使
持節于十郡兮民樂得此父母顧予懷之倉卒兮謂一
寒之何故雖解衣推食兮曰此小惠汝弗德我我九世
之良醫分藥神膏而可以破汝腸賦九言而九頓首兮
度百世而用足閱一世之風波兮曰餘皇吾以爲歸宿

碧雲賦

蹇臨高而延矚悵天邊之碧雲緬不知予何思情空至
兮繽紛懷幽蘭之令姿方揚靈乎上春顧來者之非具
人使暴露乎埃塵我有旨酒與子殷勤終濶莫致實勞

我神白日西馳去故就新發采舒光念當及晨

三酌賦

出公門而偃私酌旨酒于良辰緬再酌而三酌恍如對
乎佳賓畏局促之傷懷聊流暢乎心神懲荒酒乎無算
悠然合乎禮文蕩志文史晤言詩書世醉不足我醒有
餘頤妙物表韜精道樞冥會獨應誰知我娛

人曰飲酒賦

歲後七日其名曰人愛此嘉名酌酒懽欣豈木行之始
和生庶類而施仁又曰人者三才之中將中和之肇布

易巖殺之餘冬也乃命婦子班坐行觴酌已相祝壽考
無疆有否必泰無窮不通請觀庭下之枯折霜霰消而
敷榮羽蟲感陽而羣嬉況乎雲間之飛鴻于是三醉既
醉喜有所得安局促而不歎悟倚伏之無極

吳故城賦

亂吾舟兮大江夕余濟兮樊口登武昌之故墟弔西門
之衰柳出東郊而南眺訪遺城之培塿嗟頽牆之迤靡
半已平乎耕耨雜谿澗而沮洳稻冉冉而將秀日吳
王之故宮兮昔孫仲謀之所有當弊漢之委地羣兇聚

而塚剖偉紫髯之永圖獨穴塚乎江右豈無意于雍洛
易虛夸爲善守觀其作都于武昌夫何險陋而卽安是
爲大江之上流兮于備敵焉不繁顧諸將之凡才豈袁
曹之敢埶欲身當中原之一面兮事便時利一輩濟乎
濤瀾當是之時兩觀萬雉縹闕應門內擁燕趙之美外
屯貔貅之軍笙磬鐘鼓之喧闐旗旆車馬之繽紛固已
包蒙川澤震耀山原安知夫千載之後陵谷易位夫何
遺珠卽棄玉顧此遺墟之將圯于是與客休于祠宮披
樵蘇之微路嗟牛羊之入室固牲酒之不具與客愀然

三歎而去

予近讀曹植諸小賦雖不能縝密工緻悅可人意而
文氣疎俊風致高遠有漢賦餘韻是可矜尚也因擬
之云

臣那彥成恭校

柯山集卷三

宋

張

耒

撰

古樂府歌詞

君家誠易知曲

君家誠易知易知獨難忘
西風牆頭吹葉黃
蟲絲當戶理秋光
翠屏碧簾生朝涼
牀頭蟋蟀見焚香
鮫人綃纈雙鳳凰
上元綠鬢遮耳璫
來車去馬官道旁
碧雲傳情何處郎
相望玉樹啼寒螿

于湖曲 有序

蕪湖令寄示溫庭筠湖陰曲其序乃云晉王敦
反屯于湖陰帝微行至其營敦夢日遶之覺而
追不及故樂府有湖陰曲按晉地志有于湖而
無湖陰本記云敦屯于湖又曰帝至于湖陰察
營壘而去頃予遊蕪湖問父老湖陰所在皆莫
之知也然則帝至于湖當斷爲句乃作于湖曲
以遺之使正其是非云

武昌雲旗蔽天赤夜築于湖鋒洗鎬巴滇驟駿風作蹄
去如滅沒來不斲日圍萬里纏孤壁兵氣如霜已潛釋
蛇矛賤士識天顏玉帳髯奴落妖魄君不見銅駝陌上
塵沙起鐵騎春來飲灑水浮江天馬是龍兒蹙踏揚州
開帝里王氣高懸五百秋弄兵老鼻空白頭石城戰骨
臥秋草更欲君王分上流

襄陽曲

西津折葦鳴策策蟾蜍光入芙蓉白山頭不雨買船稀
日日門前江水窄將欲烜赫招行人旋起丹樓照長陌
銀屏深蔽玉笙閒自擘新橙飲北客倏離暫合心未果
淚瑩雙眸爲誰墮

寄衣曲

秋風西來入庭樹攀條正念征人苦空窻自織不敢任
鳴機愁寂如鳴鶻練成欲裁新絲香抱持含愁叔姑堂
別來不見衣覺窄試比小郎身更長

江南曲

江蒲芽白江水綠江頭開花自幽淑人家晨炊欲熟時
旋去網魚惟所欲往來送租只用船未省泥沙曾汗足
有錢買酒醉隣畔終日數口常在目不學長安貴公卿
每念離心寄朱轂朝遊巖廊暮海島譴人未歸身自到

怨曲二首

白首南朝女愁聽異域歌收兵頽利國飲馬胡盧河
毳幕風霜久穹廬歲月多雕窠城上宿吹笛淚滂沱
祖席駐征橈開帆復信潮隔筵桃葉泣吹管杏花飄船
去鷗飛閣人歸鹿上橋別離惆悵淚江鷺宿紅蕉

壽陽歌

壽陽樓前淮水碧壽陽美女如脂白李郎青鬢照青衫
曾在花前作狂客伯勞睡重花枝晚時許蜻蜓一偷眼
歡娛雖少恨已多織手紅箋揮翠管淮陽歸來春已暮

夜夜夢魂淮上去欲歌舊曲只添愁畫得雙蛾不能語
有客南來從壽春衆中笑問動精神自從柳別章臺後
攀折風光知幾人已伴春衫辭側帽不怕嬌啼隨意笑
嗟君耿耿獨相思須信多情是年少

勞歌

暑天三月元無雨雲頭不合惟飛土深堂無人午睡餘
欲動身先汗如雨忽憐長街負重民筋骸長穀十石弩
半衲遮背是生涯以力受金飽兒女人家牛馬繫高木
惟恐牛軀犯炎酷天工作民良久艱誰知不如牛馬福

春雨謠

晚雲欲著樹中夜一犁雨老農呼子孫力作莫辭苦風
吹潤土如炊香烹雞爲黍餉南岡我知聖人在明堂元
年已是豐年祥

少年行三首

駢弓鵠角蒼雕羽金錯旂竿畫貔虎長驅直踏老上庭
手拔干將斬狂豎歸來解甲見天子金印懸腰封萬戶
自爲大漢上將軍高揖羣公佐明主
人生豈合長貧賤師事黃公會習戰英雄天子伐匈奴

初拜將軍二十餘黃塵晝飛羽如插身射單于碎弓甲
從來書生輕武夫坐遣揮毫寫勲業

少年賣珠登主門主家千金惜一身綠鞵請罪見天子
尚得君王呼主人鬪雞走馬長安道豪傑驅來奉談笑
漢庭碌碌公與侯畏禍憂誅先白頭

古意

園中楊柳樹飛舞似含羞如何風靜處盡放眼中愁金
鋪銀屈膝動處有人挨碁盤作十字中心爲子來橘犀
如半月何日是圓時如何一種味却有兩人知

代贈

洞房飛香作春霧仙人勸酒香中語明眸第二紫雲娘
鷺學歌聲柳如舞蹙眉長歌澧有蘭銀鉤請君春草篇
繁絃高張燭燒夜玉壺未盡參在天春泥雪消淮上路
東風浪頭驚客艣惱公舊事幾夢魂過眼相逢一風雨
黃流清洛上天漢吳山洞庭藏水府謾題詩句寄歸舟
江口風狂那得渡

代嘲

過作拋人去非真我獨知如何立不定却有獨來時

牧牛兒

牧牛兒遠陂牧遠陂牧牛芳草綠兒怒掉鞭牛不觸澗
邊古柳南風清麥深蔽日野田平烏犍礪角逐春行老
犍臥嚙饑不鳴犢兒跳梁沒草去隔林應母時一聲老
翁念兒自携餉出門先上岡頭望日斜風雨濕蓑衣拍
手唱歌尋伴歸遠村放牧風日薄近村牧牛泥水惡味
幾燕趙兒不知兒生但知牛背樂

贈人三首次韻道卿

未必蝘蝓如素領故應新月學蛾眉引成密約因言笑

試得真情是別離罇酒且傾寒琥珀淚妝更看薄燕脂
北城月落烏啼後便是孤舟腸斷時

醉裏紛紛散別筵醒來客枕一燈前黃茅野岸三更月
春水長亭十里船一點淚憑誰寄與十年香在恨依然
空疑窗外梅花發珠箔青樓若箇邊

可是相逢意便深爲郎巧笑不須金門前一尺春風髻
窗外三更夜雨衾別燕從教燈見淚夜窻惟有月知心
東西芳草渾相似欲望高城何處尋

採蓮子

梅山集 卷三
齒菖香蓮十頃陂小姑貪戲採蓮池晚來弄水船頭濕
更脫新裙裹鴨兒

倚聲製曲三首 有序

予自童時卽好作文字每于他文雖不能工然
猶能措詞至于倚聲製曲力欲爲之不能出一
語傳稱裨謀謀于國則否謀于野則獲杜南陽
以謂性質之蔽大詩曲類也善爲詩不能製曲
豈謀野蔽耶爲賦三首

春絲惹恨鬢雲垂媚態愁容半在眉早是思深難語別
何堪肌瘦不勝衣眼前有恨景尤速門外無情車載脂
自笑不如天上月尊前猶有見郎時
不恨因緣不恨天強持牙板向罇前陽關一曲動山月
別淚千行盈酒船薄命有情今已矣傍人無意亦凄然
願君學取梁間燕秋去春來到妾邊

山未高兮海不深此情此意薄千金今朝酒伴雙垂淚
明夜燈前獨擁衾玉筋異時空見跡塵犀千里亦通心
桃源路絕無人到應許劉郎再訪尋

劉壯輿是是堂歌 并序

子劉子構堂于官舍名之曰是是而求予爲詩
予復之曰夫物生之所必有而其爲物彼是相
次而不能定夫一者天下之是非也雖聖人出
無如之何昔楚人有莊周者多言而善辯患夫
彼是之無窮而物論之不齊也而託之于天籟
其言曰吹萬不同而使其自己也周之爲此言
自以爲至矣而周固自未離夫萬之一也而揭
足以爲是非之定哉雖然如周者亦略稅駕矣
劉子乃構堂揭榜而獨以是是非非自任吾將

見子吻傲氣殫而言語之戰未已也嘗試爲子
歌堂中之樂而息子之勞庶幾隱几而嗒然者
乎歌曰

讀堂中之書兮以致子之眠飲堂中之酒兮以休子之
言是非雜然于子之耳兮付庭中之歎蚓與夫木上之
鳴蟬庶幾養生而保和兮窮子之年

獨處愁

高高花飛驚愁顏珠簾晝鎖春風閒少年金鞦照秦地
玉卮雙覆塵埃間花間蝴蝶雙飛舞感觸深心心更苦

昨夜陰雲數尺許連宵變作西窗雨

遠別離

遠別離明當入蜀去酒酣日落客心驚起與僕夫先議
路引車在庭牛在槽桐枝嫋嫋秋風豪別情惆悵氣不
下酒觴翻污麒麟袍緩緩清歌慰幽獨不惜更長更燒
燭贈君髮上古搔頭莫易此心如此玉平生每笑花飛
片東家吹落西家怨但得歸時似別時相知何必長相
見

行路難

人生動與衣食關百年役役誰爲閒四時睡足鞍馬上
去歲錢塘今長安車愁羊腸夜險折船畏人鮮晨驚湍
九州一身恨自惜使我顏色常鮮歡天地一氣成萬象
融卽是江結是山再願洪鑪鑄融結萬世更無行路難

白紵詞二首效鮑照

搖輕裾曳長袖爲楚舞千萬壽新詞白紵聲按舊朔風
捲地來崢嶸燕雁避霜饑不鳴高堂酒多華燈明
回纖腰出素手髻墮鬢傾釵欲溜爲君歌舞君飲酒歲
云暮矣七澤空湯湯漢沔天北風玉壺之酒樂未終

七夕歌

人間一葉梧桐飄蓐收行秋回斗杓神官召集役靈鵲
直渡銀河雲作橋河東美人天帝子機杼年年勞玉指
織成雲霧紫星衣辛苦無歡容不理帝憐獨居無與娛
河西嫁與牽牛夫自從嫁得廢織絰綠鬢雲鬢朝暮梳
貪歡不歸天帝怒謫歸却理來時路但令一歲一相見
七月七日橋邊渡別長會少知奈何却悔從來歡愛多
怱怱萬事說不盡燭龍已駕隨羲和河邊靈官催曉發
冷嚴不管輕離別空將淚作雨滂沱淚痕有盡愁無歇

我言織女君莫歎天地無窮會相見猶勝姮娥不嫁人
夜夜孤眠廣寒殿

琉璃瓶歌贈晁二

火維愁茫地軸傾下有積水潛鯤鯨鰲身翻瀾山爲崩
金烏下喙獐龍騰狂鬚奇鬣萬族朋巨神日月雙手擎
夸娥愁思烏戢翎老魚戰死風雨腥長彗下掃千里驚
淺洲一席塊爲城蠻兒夷女奇弁纓大舶映天日百程
怒帆吼風戰飛鵬舟中之人怪眉睛獸肌烏舌髻翹撐
萬金明珠絡如繩白衣夜明非縞繪以有易無百貨傾

室中開燦光出楹非石非玉色紺青昆吾寶鐵雕春冰
表裏洞徹中虛明宛然而深是爲瓶補陀真人一鉢衣
攀滕燕坐花雨飛兜羅寶手親挈携楊枝取露救渴饑
海師跪請頽有胝番馬寶市無光輝流傳人間入吾手
包以百襲吳縣厚擇人而歸今子授爛然光輝子文章
清明無垢君肺腸比君之德君勿忘與君同升白玉堂

九江千歲龜歌贈无咎

靈龜千年口不食以背負牀飲其息吾家兩龜豈徒不
食亦不息壽與萬古無終極濟南晁君博物天地通夜

窺牛斗頗似晉司空指我兩龜有名字大龜爲九江小

龜號千歲老龍洞庭怒蕩覆堯九州

原注謂半山老人

禹咄嗟

水平流

原注謂迂叟

九江無波拍天浮中有大靈背如邱南

風吹楚澤蓮葉清欲秀有物中作巢一寸立介冑霞衣

仙人鬢如霜飲以南極之光芒丹顛老客不相見飛渡

東海巢

案巢一本作朝

扶桑邇來蟠桃枝有子大如缶浮游輕

于鳥

案此句一本作我身輕若蓬

江海一回首青珊瑚柱碧搖宮水

仙焚香吹作風朝戲蓮葉西暮遊蓮花東秋風蓮子熟
歸去清江國小千歲大九江我久不見之向君案前雙

我謂晁君二物有似我與子國有守龜吾子是燦然天
下之寶器黃金之滕紫瑤匱天王端冕史再拜一逆二
從定大事我身百無用頗似千歲潛深淵不願人間貯
金籍玉享富貴但願寄身江上一葉之秋蓮萬物才不
才用舍不任天寄聲問晁君然不然

大雪歌

老農占田得吉卜一夜北風雪漫屋屋壓欲折君勿悲
隴頭新麥一尺泥泥深麥牢風莫吹明年作餅大如箕
野人食飽官事少莫畏瑟縮寒侵肌高堂晨興何所爲

門無馬跡人更稀珠樓玉閣瓦飛動坐見貧屋生光輝
無功及物慚受祿豐穰幸賴天與之棄糧遺粒待雞犬
吾羹何得長烹藜

孫彥古畫風雨山水詩

山深巖高石壁白佳日忽變天晦冥黑風驅雲走不停
驚電疾雨來如傾山前雨點大如手山下水湧危槎橫
崩崖古樹老有靈吼怒直與風雲爭枝披葉偃鬪不怯
萬竅却欲藏雷霆鞭驢疾驅者誰子石路嶮澀驢凌兢
目迷心懾愈不及來憩樹下如寒蠅蒼芒直與鬼神接

恍惚不保龍蛇驚平居此樂忽入眼孫家古圖纔可辨
奈何一幅一尺餘欲奪天地之奇變我心愛之良有以
昔苦山行親遇此一生兩足不下堂輸爾朱家貴公子

歲暮歌

北風吹雪送暮冬重雲如山爭塞空百年老樹吼欲折
塌翼不見南飛鴻堂下幽姿亦可悅點綴小樹花玲瓏
老人重裘不能煖永夜惟守深爐紅啾啾寒雀飛不起
饑啄凍土藏枯叢青春欲回水官怒摧拉未使陽和通
天時平分各司一典廢誰得專其雄杜門解纜聊有待

行看馬脚春泥融

光山謠

艤舟淮南望新息天遣清淮限南北崎嶇細路入光山
野色蒼涼秋日白八月穫稻田無水蚱蜢羣飛稻乾死
危橋絕澗聞水聲喧喧汲水爭瓶罌昏昏落日銜遠山
鳥啼車轍未得閒縣公吳生我世舊爲我烹羊酤斗酒
燈前醉飽紛就眠五更開門星滿天長年他鄉心惘然
遠途辛勤難具言

用劉夢得三題

春向晚斜日在高樓幽花愁脉脉輕絮去悠悠冉冉三更雨蕭蕭通夜愁

春已暮把酒送春歸花落鳴禽散草長遊客稀去年堂上燕故故傍人飛

春竟去白髮感生平流水去不斷夕陽猶有情舊時桃李月悄悄向人明

臣王坦修恭校

柯山集卷四

宋

張

耒

撰

古樂府歌詞

年年歌

年年西風白露天爛醉村釀秋池原今年杜門不復出
爲愛我庭風日寬東西相望兩叢竹正色森森立青玉
朝烟暮雨恣陵奪翠鳳文章終郁郁苦榴新栽果不實
下有蕭條冒霜菊人情雖欲薦我酒物意豈願羸君菊
東欄黃葵色貴麗氣壓滿欄香撲藪月桂淒涼何足數

蛛網挂蟲窘如束安能卒歲不改芳正自榮枯隨衆木
陶陶吾意方有在瑣瑣眼前安足錄朝來默坐有佳思
病去身輕如脫梏從來北客望江南何用登樓傷遠目

鷓鴣詞

樹頭元衣郎神爽聲復清睡先萬自覺起對殘月星憫
世耽睡昏體穢神不靈招使離衽席啼呼每丁寧幽人
最憐汝未旦起坐聽荒山多嘉樹春盡故園情

圍碁歌戲江瞻道兼呈蔡祕校

蔡子圍碁非我敵我謹事之如大國主盟召會不敢辭

近忽憑陵有驕色鄒人戰魯固非宜於越入吳誰可測
願君勿以大自驕知小深謀戰須克區區江子似邾婁
我如強魯端能役凌兢螳臂屢見拒我但憐子心難得
近來措置尤小獰何異穿窬時有獲可憐癡將不知兵
請視吾旂豈冥北饑魚貪餌不知鈎口雖暫美身遭食
雖然吾亦守疆場防患猶須謹蝨賊上攀蔡子雖已遼
晉楚周旋終有日下觀江子行逾遠我進駸駸未知極
嗟予自謂敢忘謙事有真誠難掩抑爲君聊發一笑端
欲問吾碁視斯檄

周氏行

亭亭美人舟上立周氏女兒年二十少時嫁得刺船郎
郎身如墨妾如霜嫁後妍媸誰復比淚痕不及人前洗
天寒守舵雨中立風順張帆夜深起百般辛苦心不惜
妾意私悲鑑中色不如江上兩鷺鷥飛去飛來一雙白
長淮杳杳接天浮八月搗衣南國秋謾說鯉魚能託信
祇應明月見人愁淮邊少年知妾名船頭致酒邀妾傾
賊兒惡少謾調笑妾意視爾鴻毛輕白衫烏帽誰家子
妾一見之心欲死人間會合亦偶然灘下求船忽相值

郎情何似似春風靄靄吹人心自融河中逢單還成阻
潮到蓬山信不通百里同船不同枕妾夢郎時郎正寢
山頭月落郎起歸沙邊潮滿妾船移郎似飛鴻不可留
妾如斜日水東流鴻飛水去兩不顧千古萬古情悠悠
情悠悠兮何處問倒瀉長淮洗難盡只應化成淮上雲
往來供作淮邊恨

啄木詞

紅錦長條當背垂紫檀槽穩橫朱絲美人亭亭面如雪
纖手當絃金捍撥彈成了丁丁啄木聲春林蔽日春晝晴

徘徊深枝穿翠葉玉喙勞時還暫歇深園斷嶺人不知
中有差枒風雨枝蠹多蟲老飽可樂山靜花深終日啄
雄雌相求飛且鳴高枝礪嘴枝有聲無功忍使饑腸飽
有意却教枯樹青疾彈如歌細如語曲欲終時情更駐
一聲穿樹忽驚飛葉動枝搖不知處

瓦器易石鼓文歌

周綱既季宣王作提劍揮呵天地廓朝來吉日差我馬
夜視雲漢憂民瘼桓桓方召執弓鉞藹藹申韓賜圭爵
北驅獫狁走豺狼南伐淮夷斬鯨鯢明堂車馬走爭先

清廟笙鏞口載樂岐陽大獵紀功伐石鼓巖巖萬夫鑿
千年兵火變朝市後世紙筆傳冥漠迹荒事遠貴者寡
歎惜風霜日摧剥君誠嗜古更過我易以瓦器尤奇卓
滿盤蒼玉列我前制古形奇異雕琢義黃已亡巧僞起
采椽土木消純樸何爲獲此上古器經歷萬古遭搜掠
寥寥墨翟骨已朽尚有遺風傳隱約又疑晏子矯齊俗
陶土搏泥從險薄或云古者宗廟器斥棄金玉先誠確
是時此物參鼎俎賁梓土鼓誠爲樂嗚呼二物信奇絕
賴有吾徒與提握不然烏瓦與荒碑坐見塵埃就零落

片雪歌

瑤池一片孤飛雪風急身輕飛不歇誰將翠袖遮得歸
十斛明珠換與誰金龜貴客迎將去玉作轡駟載塵霧
人間不解桃李心獨與琵琶自相語主人白頭情不親
朱樓夜鎖梨花春願同花落寄流水飄出朱門隨路塵
長恐此生空已矣從此失身輕薄子人生但樂兩知心
誰是瓊瑤孰泥滓鶯鷺中彈花辭樹蝶散蜂驚春日暮
風光不斷流水長不知片雪今何處

梁父吟

豪俊昔未遇白日無光輝隆中卧龍客長嘯視羣兒九
州英雄爭著鞭黃星午夜照中原君看慷慨有心者乃
是山東高帝孫老瞞抱璧控馬走紫髯江左空回首世
上男兒能幾人眼看袁呂真何有永安受詔堪垂涕手
挈庸兒是天意渭上空張復漢旂蜀民已哭歸師至堂
堂八陣竟何爲長安不見漢官儀鄧艾老翁誇至計譙
周鼠子辨興衰梁父吟君聽取擊節高歌爲君舞躬耕
貧賤志功名功名入手亡中路逢時兒女各稱雄運去
英雄非歷數梁父吟悲復悲古今人事半如此所以達

和山集 卷四 五
士觀如遺龐公可是無心者何事鹿門招不歸

度關山

度關山意悠哉秦關路險行車摧秋雲沉沉天未曉關
吏正眠關未開孟嘗逃秦畏秦逐一日歸齊未爲速重
扉當道可奈何搔首蒼茫空駐轂主君無言客無計仰
看天星俯相視風鳴木響心自驚咄嗟謾養三千士下
客趨前敢獻誠爲君試效晨雞鳴引聲未絕羣雞應軋
軋重門俄徹局馬嘶人語車輪轉斗柄橫斜夜初半奔
風捷足欲何追虎口脫身非素願孟嘗好士竟何爲纔

得雞鳴狗盜兒可憐當日慙慙意輟食分衣竟爲誰

天馬歌

風霆冥冥日月蔽帝遣真龍下人世降精神馬育天駒
足躡奔風動千里蕭條寄產大宛城我非爾乘徒爾生
小羌男兒漫羈綫櫪上秋風時一鳴萬里名聞漢天子
內府鑄金求騾駟將軍受詔玉關開靈旂西指宛王死
天馬出城天駟驚塞沙颯颯邊風生執驅校尉再拜馭
護羌使者清途迎麒麟殿下瞻天表天質龍姿自相照
翠蕤黃屋兩邈迤玉鐙金鞍相炫耀東游封祀被和鸞

甲子北來巡朔邊展才自覺逢時樂致遠不知行路難
物生從類如有神地無遠近終相親君不見莘野磻溪
耕釣叟一朝吐氣佐明君

江南曲

平湖碧玉烟波闊菱荷風起秋香發採蓮女兒紅粉新
舟中笑語隔烟聞高繫紅裙袖雙卷不惜浮萍沾皓腕
爭先採得隱船篷多少相欺互相問吳兒蕩槳來何事
手指荷花示深意郎指蓮房妾折絲蓮不到頭絲不止
月上潮平四散歸舟輕楫知去如飛斷腸脉脉兩相語

寄情流水傳相思

籠鷹詞

八月穫黍霜野空蒼鷹羽齊初出籠劍翎鈎爪目如電
利物新淬龍泉鋒少年臂爾平郊去草動人呼躍寒兔
竦身下擊霹靂忙毛逐奔風血濡距爾能搏兔不能食
未飽中腸行復擊主人厭兔爾尚饑一生不快爲人役
蒿間黃雀鳴啾啾饑啄野粟心無求賦形雖小技能薄
不受羈縻得自由

拳毛駒歌

北牕掃壁陳圖書氣殺凜凜生坐隅誰將尺素畫駿馬
 云是文皇昔日拳毛駒龍顛虎脊視天地若滅若沒三
 萬里皇天產此誰得之蚪鬚十八真天子擒王滅竇如
 塵埃英氣貫日天為開黃金甲光照天地大白羽前馳
 風雷原注唐文皇與單雄信挑戰雄信運鐵槊文皇以
 大白羽箭射之中其槊出火數尺雄信即遞去
 真龍在殿萬馬疾下視四海皆驚駭榛棘昭陵一抔土
 柏城六馬莓苔古嗚呼駿馬已埃塵雖有燕昭難再親

寒鴉詞

寒鴉來時九月天黃梁蕭蕭人刈田啼聲清哀晚紛泊

迭和羣音和且樂朋飛聚噪動百千頸腹如霜雙翅玄
 風高日落田中至部隊崩騰鉦鼓沸高林古道榆柳郊
 落葉晴霜荆棘地志士朝聞感歲華出家候爾知寒事
 墉頭雪消牛挽犁蕩漾春風吹爾歸投寒避暖竟何事
 長伴燕鴻南北飛我滯窮城未知返為爾年年悲歲晚
 扁舟東下會有期明年見爾長淮岸

寒食歌

東風芳草長寒食春茫茫人家掩門去雞犬自相將原
 頭簇簇柳與花行人往來長歎嗟舊墳新塚累累是裂

錢澆酒何人家桑上鳴鳩喚山雨雨腳蕭蕭山日暮歸
來門巷正春寒花底殘紅落無數北里悲啼夜未休清
絃脆管起南樓古今歌笑何時盡芳草白楊春復秋去
年巧笑鞦韆女今年嫁作東家婦綵繩畫柱似當年只
有朱顏不如故百人學仙無一成麻姑不見但聞名萬
斛春醪須痛飲江邊漁父笑人醒

飛螢詞

碧梧含風夏夜清林塘五月初飛螢翠屏玉簾起涼思
一點秋心從此生方池水深溪雨積上下輝輝亂凝碧

幸因簾捲到華堂不畏人驚照瑤席漢宮千門連萬戶
夜夜熒煌暗中度光流太液池上波影落金盤月中露
銀闕蒼蒼玉漏遲年年爲爾足愁思長門怨妾不成寐
團扇美人還賦詩避暑風廊人語笑欄下撲來羅扇小
已投幽室自分明更伴殘星碧天曉君不見連昌宮殿
洛陽西破瓦頽垣今古悲荒榛腐草無人迹只有秋來
熠燿飛

齊安行

黃州楚國分三戶葛蔓爲城當樓櫓江邊市井數十家

城中平田無一步土岡瘦竹青復黃引水種稻官街旁
客檣朝集暮四散夷言啁哳來湖湘使君麗譙塗聖赭
門狹不能行兩馬滿城鼃噪亂更聲谷風穀穀黃鴉鳴
最愁三伏熱如甑北客十八八九病百年生死向中州
千金莫作齊客遊

一百五歌

山民歲時事莽鹵猶知拜掃一百五平明士女出城闈
黃土岡前列尊俎窮包粉餌蒸野蔬富家烹羊貧薦魚
日暮肩輿踏風雨江鄉人家無犢車插花飲酒山邊市

醉後歌聲動鄰里南人聞歌笑相尋北人聞歌淚滿襟

秋風謠

秋風起秋雲高連山草木如波濤大江蕩潏魚龍逃
羲和奔忙日車逸八柱傾側恐不牢柯山老人拚蓬茅畏
寒理我舊縑袍粗餐在盤有濁醪醉飽高臥從呼號

東臯行

秋雲捲盡秋天清東臯蕭條雞犬聲黃葉吟風聲不平
芙蓉半落更有情歸來僮饑羸馬疲城頭樹暗烏欲栖
誰家朱樓人夜宿微紅一點簾間燭

正月詞

紅梢一夜櫻桃雨
簾捲曉晴鳴鴉語
簾旌細浪滾東風
迎得春歸與爲主
玉手嬌慵添繡線
欄下菖蒲近相見
雲屏曉睡翠翹橫
樓上寒時正五更

二月詞

滾風畫幕長廊靜
簾下人眠初日永
嚶嚶不動採花蜂
夜來露重薔薇冷
芳草長時寒食天
紅墻低處見鞦韆
人家無事雞犬閒
日暮芳郊畱醉眠

饑鳥詞

北風夜雨烏翅濕
低飛野畦啄遺粒
啄食不飽還畏人
嗚呼隔壠自求羣
我行陳宋經大澤
田荒生茅不種麥
空腸待飽明年禾
鴉鴉爾饑獨奈何

苦寒行二首

淮南苦寒不可度
積雪連山風倒樹
長淮凍絕魚龍愁
哀鴻傍人飛不去
雪中寒日無暖光
六龍瑟縮不肯驥
老憊孤舟且復止
堅冰三尺厚于牆

茫茫楚鄉仲冬月
白屋無烟飛走絕
空林號風冰斷枝
長淮無人冰照雪
凍埋釣艇不復漁
南羹未嚼淮中魚

要須下擘澄湫水，剽取寒蛟烹腹腴。

春詞

寶刀裁花碎羅縠，帶臘圓紅黃染粟。枝頭幾日卽花開，
世上人情何太速。東風未轉北風嚴，返挂銅鈎不上簾。
莫怪蛾眉呵素指，層簷冰碧玉纖纖。

宮詞效王建五首

夜來霜重著欄干，玉殿無塵玉毳寒。日日君王罷朝早，
禁廷無事一冬閒。

簾外微明燭下妝，殿門放鑰待君王。玉堦地冷羅鞋薄，
衆裏偷身倚御牀。

昨夜新霜滿玉堦，初冬處處火爐開。中官逐院傳宣賜，
南國諸侯進橘來。

玉墀夜色晝昏昏，催放朝班散侍臣。隨駕上樓同看雪，
萬重宮殿一時新。

蓮燭千枝夜宴遲，君王索筆寫新詩。宮人和得爭先進，
偏愛宋家兄弟詞。

早謠

七月不雨井水渾，孤城烈日風揚塵。楚天萬里無纖雲，

旱氣塞空日晝昏土龍蜥蜴竟無神田中水車聲相聞
努力踏車莫厭勤但憂水勢傷禾根道傍執送者何人
稻塍爭水殺厥鄰五湖七澤水不貧正賴老龍一屈伸

貽潘邠老一有序

予居柯山西潘邠老居東九月十一日往過之
逕蔬圃坐修誠堂竹間歸飲于龜蟬之間殊有
佳興作雜言貽之

有屋可以讀書有竹可以忘憂採庭之菊香有餘烹園
之蔬甘且柔賢哉二子又復何求鬼不爾責人不爾仇

沽酒可飲江魚可羞又安用列鼎食珍佩印封侯我居
柯西相隔一里可以杖履朝往而夕遊必未厭我乞醯
與借馬但只恐勤君赤脚與露頭不然將吾顏子簞食
瓢飲屢空之樂又欲翻董生清明玉杯繁露之春秋

醉中雜言

老人攀花復藉草春力著人如醉倒未容作計試留春
東風已與人俱老東君惜春不惜花千紅萬紫委泥沙
已教白日張錦繡更欲平地興雲霞我欲呼客無酒肉
摘花插頭悲髮禿安得釀酒萬甕屠干羊花間醉飽踏

春陽

春陽舒照
東風起與
人與
春陽舒照
東風起與
人與
春陽舒照
東風起與
人與

柳中散育

臣王坦修恭校

柯山集卷五

宋

張

耒

撰

古樂府歌詞

龜山祭淮詞二首

迎神

木梟梟兮蒼山巔
回泐重深兮其下九淵
東風歌兮春水舞
庭肅肅兮神來下
神來下兮翠帷舉
谷冥冥兮空山雨
雨三休兮神三燕
游雲高兮見極浦
安我舟楫兮君不怒
水濱之人兮苦思君
菖蒲生兮楊柳春
解君旂

兮醉君御樂一日兮莫予棄

送神

楚巫醉兮君不留春風起兮木蘭舟弭余楫兮飲君酒
君既不顧兮駕龍以出遊凌九江兮勒滄海萬龍舞兮
百靈會君孔樂兮我思君望君故居兮其上片雲水淪
淪兮石綠礫空祠草長兮風雨入君屋山中春兮鳥鳴
悲明月皎皎兮中夜來

惠別

洞簫奏兮瑤瑟御日不足兮繼以夜吾寧獨此湛樂兮

嘉予美之宜修披浮雲出明月兮揮衆星不與謀既成
言以命予兮顧永予之光明豈獨謂不然兮託東風以
惠聲嗟言獨何容易兮有傾身者鬼神中懷著而必見
兮卷蘭舌而交信予雖不執子明燭兮光輝其舍予兩
相審者不媒兮予既獲子于鼻息舒子聲以歌兮鳳凰
將聞而振羽結子佩而起舞兮星斗視子而上下獨翩
翩其不可留兮君之居可知而不可得春水渙渙兮予
獨飲君河之曲鳥鳴羣飛兮其下芳草柳舒舒其可攬
結兮桃李始就其膏沐行者懷兮別者思酌君酒兮壽

君以不衰撫君舟之悠然兮將浩渺以浮航三江震澤
兮舟師告憊而一息引日星之煌煌兮吾獨望子于南
極想子其下兮鼓聖濤而鞭蛟龍使宓妃不敢巧笑兮
皇英斂衽而來從南風之來兮入予裾悅余心獨條暢
而清婉兮曰是爲故人之風

愬魃

並序

壽安夏旱麥且死民憂之無所不禱雲旣興輒
有大風擊去之間而雨塵不辨人物類有物爲
之者張子攷于詩以爲旱之神曰魃意者魃爲

之乎作愬魃詞

帝治下土兮遠于民撫御萬方兮周無垠物類億千兮
莽莽綦出入日月兮運星辰廣必有容兮濳姦昏不上
愬兮帝曷聞歲庚甲兮斗建巳旬逾十兮雨不施秀者
焦兮實者悴麥莽莽兮不出塊舊穀旣沒兮待新以食
奪其所望兮民憂以惑捨耒而兵兮奪攘剽賊急不知
慮兮求生頃刻民幸帝兮詔雲師氣朝升兮斂陽暉孰
鼓風兮震川岳上者揚兮旁者剥雲雖仁兮不得施野
童童兮草木摧孰揚塵兮蔽朝日紛霏霏兮冒萬物昏

迷蒙兮浩恍惚瞭者瞖兮失南北瘞根莖兮腐葩實世
慘錯兮澤蓬焮霍霍然兮侵萬室飄雨塵兮以旦以夕
民曰誰爲兮尸是有物其名曰魃兮旱是司惡濶忌澤
兮盜陽威淫視槁木兮疾華滋憎飽妬飫兮幸民饑亢
不伏兮風以助之慘懷柔茂兮塵埃是吹來炎火兮爛
燁煌馭回祿兮驂畢方朱旂旒兮絳帷裳坦無畏兮樂
洋洋朋疫癘兮友疾殃徒甚劇兮黨甚強慢帝威兮分
害戕竊祠禱兮傲驅攘民賴帝仁兮以衣以食上帝孔
昭兮愬無禍責幸帝震怒兮降魃罪疾無俾在世兮幽

敘雨

有序

沉深溯雷伐鼓兮電揚旂雨卷壑兮雲張帷泛游澤兮
湛甘滋充槁瘠兮奮枯萎禾黍茂兮蔬果肥歲旣登兮
民飽嬉康帝民兮恩甚思幽斯魃兮宥無期

福昌之民有禱旱于西山者取山之泉一勺祠
之不數日而雨邑民言旱歲取水以祠輒應且
其取之者非特福昌也張子神之作歌以揚之

西山之泉兮冽以清淳注萬古兮無虧盈應龍蟠守兮
謹防局有神司之兮卽羣靈神君曷處兮山之穹雲郭

霧闕兮都邃宮騰駕逸景兮馭清風上友仙聖兮佑帝
躬惟今之旱兮非神曷愬家無餘糧兮麥不庇雨土飄
塵揚兮迷行錯步慙威孔張兮熾莫予禦挹水一勺兮
薦羔豚曷求于水兮神實憑土有蔬兮林有實芼馨香
兮蒞芳鬱神我饗兮臨我堂酌芝醕兮御椒漿巫甚祗
兮時甚良哀我疾兮降我祥神君仁兮念下民撫民災
兮號帝闡帝念神君兮詔雨官叱馭六龍兮奮互飛鸞
掣飛電兮鼓雷震俾霈爾澤兮正無限山靈川怪兮更
騰奔角毛羽鬣兮爛鱗鱗前幢後旆兮之雙輪椎轟喧

呵兮翻乾坤神龍九鬣兮雜蛟鯤瞠眼飛涎兮翻鰓齧
伏潛羲和兮止星辰一洒萬里兮傾河津妖風失威兮
斂以奔魃濡厥裳兮伏以蹲槁蘇焦澤兮息悒焚優渥
潤沃兮無涯垠菽粢詵詵兮奮裳紳秋種既卽兮農則
勤既足而止兮披霧昏朝陽清明兮斂游塵功名不居
兮駕歸雲空山寥寥兮夜無聞靈泉幽幽兮湛齋淪竭
誠莫報兮仁哉君

友

張子官于福昌塊然獨居無與爲友賓客不至遺朋失

舊經時閉門終日鉗口出無與遊居無與就誰同我食
誰酌我酒歸守妻孥出對廝走駕言出遊田童野叟氣
否莫交情包不剖塞聰蔽明盤足袖手披書閱簡眩目
疲肘厭然成瘡不可針灸于是張子滌慮除煩披庭掃
堂枕手而眠恍若有遇有神降焉曰我實哀汝獨無友
朋我有教告子乎我總凡世之人百愚一賢古昔所歎
非獨今然得賢與朋善固無儷賢不可得將愚與此友
賢實難幸然後值不幸友愚與無孰利諂笑傾辟韜情
晦實測心獻計因隙投策口是腹非面歌背泣友若此

者實繁孔多曷若不見目清耳和我復告子真友之實
爾遵我言友胡有竭人物雖殊可友同焉賜爾以友其
名曰山居汝左右在汝北焉端不汝去澹兮絕言春麗
夏繁秋踈冬瘦霞霧融明風馳雨驟孤楫橫奔罕屯巧
鏤傲岸軒昂清華潤秀對食臨眠排堂入牖効技汝前
雖勞不疚山有佳泉多灌爾園歷石懸空泠泠清漱如
聞妙音濯煩浴垢不猶愈乎卑議庸讀過耳增慙入心
善煩者乎山有修竹汝園是植靜麗明鮮端虛正直如
彼正人揚言發色微風散碧宵月鏤白不猶愈乎市兒

塵顏歌眉鼓吻佞笑浮言工爲媚悅善佞曲拳者乎山
有喬木聳立而峙端無媚姿若對正士障兩蔽暘千人
所芘微颺披拂吹奏竽籟不猶愈乎蠕蠕鼠輩女黠兒
嬌奴趨妾拜者乎山有好鳥清喉麗羽引嘯長鳴羣呼
迭語夜管風絃哀簧怨柱不猶愈乎巷歌里舞促縮跳
梁顛妖淫汚父子不施棄禮忘數者乎如前賈繁言胡
可殫汝與之樂右攀左援曷爲子子寤寐嗟嘆張子再
拜受言永懷解累亡憂心通志開高山巖巖流水潺潺
竹茂木翹鳥鳴琅然如前夷齊而後閔顏吾何爲乎浩

然其間

種菊 有序

張子病目眩而視昏醫有勸食菊者春夏食葉
秋冬食花張子以爲菊華于草木變衰之際而
又功足以禦疾類有德君子因求而植諸庭焉

何馨香之芬敷兮昌綠葉而紫莖是其名爲菊兮爰植
子之中庭性清平而不躁兮味甘爽而充烹當秋露之
慘淒兮舒煌煌之華英色正而麗兮氣芬以清純靜秀
潔兮族茂羣榮採食以時兮天和以寧穎輕窳達兮瞳

子清明散敗流濁兮風宣滯行仙聖所餌兮屏除臭腥
久嗜不廢兮將延爾齡嗟予生兮寒薄煩冥憂饑畏寒
兮微祿以生終曷歸兮山林是營膏粱鼎食兮方丈縱
橫炙熊之蹠兮龍醢羊羹彼得有命兮吾奚爾榮惟茲
佳菊兮野食以生採擷咀食兮薦俎盈登求之孔易兮
世焉莫爭我有久疾兮壅塞煩昏支節堅痺分氣闕于
元憊不能支兮外壅中乾疥癬得志兮蟻蚋伏蟠餐華
秋冬兮食葉春夏集新易故兮爾功是假寧康我軀兮
骨節堅良產和剔戾兮其樂洋洋反華于玄兮易瘦以

強忘生絕俗兮深潛遠藏驂駕雲霧兮呼吸太陽招友
彭咸兮御風以翔吁嗟此菊兮吾于爾望

逐蛇

有序

福昌官居北負山爲堂有大蛇穴堂北時下飲
堂南水中人皆以爲神見者不敢逐或禱祠焉
張子曰是吾居也蛇安得而處之且蛇爾安有
所謂神者作此逐之

嗟堯之時兮大水滂橫潰四海兮包陵岡蕩流湧汨兮
周無傍龍騰蛇奔兮嬉以狂腥鱗頑鬣兮更披猖城居

穴處兮亂厥常頽蟲糾結兮肆害戕陸盤淵據兮傲不
臧朋屯黨集兮蕃以昌穿穴噬嚙兮民盡傷下民既病
兮帝弗康黃熊幽極兮羽山陽乃命伯禹兮行四方乘
高趨卑兮陵復航鑿山疏源兮導河江萬水下走兮來
洋洋經畫九野兮興農桑驅龍放蛇兮屏諸荒焚山燎
野兮無遺芒野巢窟居兮保厥疆敢有弗率兮斷爾吭
伯益作志兮稽妖祥帝虞耄勤兮黜子商天授神禹兮
夏是王九牧作貢兮金鑑鎡大冶鼓鑄兮騰精鋸巖巖
九鼎兮峙且剛奇形詭質兮走與翔鱗毛羽裸兮雜短

長求情抉態兮幽微彰制馭百怪兮嚴紀綱獸蟲人鬼
兮安其鄉殊宮別域兮異存亡曷爲茲蛇兮宅我居妖
頑堅老兮傲驅除深潛居此兮坦無虞下飲我沼兮稍
林株朱眸丹舌兮玄鱗膚恍惚遽速兮疑有無居者畏
避兮行者徐險奪我圃兮駭我徒盜竊祭禱兮欺羣愚
我咨爾蛇兮潛山而穴野陰蟠遠伏兮與人乎異舍冬
居夏游兮時以行食爾之食兮朋爾朋僭亂我居兮常
失經叛棄爾守兮帝有刑胡昏與頑兮居以寧自爲不
寧兮邀割烹荒戾天理兮悖程聖我宥爾愆兮逐爾行

亟舍故處兮遐以征南山之幽兮雲霧冥草木蒼蔚兮
嶮不平爾徒實繁兮食惟爾盈捕取不至兮居無與爭
汝生孔遂兮壽緜爾齡物違其常兮禍之所集豐狐晝
游兮冬裘以白龜厭洲處兮吉凶是卜處不畏人兮皮
包戈戟矜險恃孽兮其終鮮克我言孔昭兮語汝以理
日吉時良兮汝造以逝

登高

懷不展兮居無聊默諄語兮浩長謠寫我心兮登彼高
陟萬仞兮捫九霄命清風兮披浮雲瞰四荒兮視天垠

大海蕩涌兮潛龍鯤吐吞日月兮制明昏醞釀元氣兮
函星辰羽載四海兮芥浮坤四岳列峙兮嵩中蹲牽連
脈絡兮子復孫草蔓木布兮升降如朋障南蔽北兮東
散西分如掌列塊兮盤羅豆罇黃流中貫兮發源崑崙
東鶩大海兮縈如繚紳南方炎炎兮火之所宅朱鳥屹
峙兮丹膺絳翮騫飛以翔兮輝煌爛赫從擁萬羽兮紛
羅羽翼煌煌尊嚴兮有斗在北升降玉都兮運量帝側
呼吸陰陽兮秉持禍福真仙逍遙兮澹不可挹西有王
母兮戴勝穴居壽歷萬古兮忘終泯初超遼恍惚兮獨

與道俱騷友日月兮羣靈走趨旣又左而東顧兮觀大明之始生震沸九淵兮麗天升精披攘羣陰兮重幽昭明有神司馭兮朱裳絳纓呼造物以致問兮吾將放乎太初彼天地其孰始兮日與月其代除四荒漫其何極兮人胡爲而中居火何爲而南宅兮水孰使其在北安知東之主生兮西配刑而主殺斗建寅而氣分兮疇爲四時之消息世徒知其已然兮遂推類而立說彼厥初其孰造兮孰布施而殊別抑其不得不然兮或者私智之所設將忽然而自爾兮遂已成而不可絕造物爲余

究察兮曰此曷可以言陳而意悉彼混沌之一氣兮吾不知誰合而爲一忽洞達而兩分兮夫亦安知其誰闢爰升清而降濁兮水赴陰而火陽東升氣而敷生兮西或成而害戕強名之曰自然兮曷足以究其必至謂不得不然者愈疎兮尚安取于私智莊周誕而妄推兮夏革愚而臆對世號予曰造物兮予亦曷有所主尸苟待予而後造兮彼造予者復誰姑置之而勿校兮任萬物之自成游小智于太初兮何異夏蟲之語水曠任之而勿疑兮萬里會而一平夫何造物者開予兮神飄飄而

不居我將赴而遠遊兮招神聖以爲徒騰九螭之奔輪
兮追飛電而攬奔風周萬里于一息兮堂西極而有九
區叩玉闕之九關兮覲上帝于絳都酌瑤尊之芳酒兮
招赤松而友彭祖旣錫我以難老兮黜嗜慾而襲靈虛
爰侑我以秘藥兮合千籥而吹萬竽樂吾心之洋洋兮
舒五體之與與降復還于我室兮聊彌日而一娛

子由先生示東坡公所和陶靖節歸去來詞及侍
郎先生之作命之同賦未輒自憫其仕之不偶又
以弔東坡先生之亡終有以自廣也

歸去來兮行世不偶予曷歸其出無所爲喜兮舍去而
何悲眇一世之無與兮古之人逝莫追求不疚于予義
兮又奚恤餘子之是非彼好惡之罔極兮或顛倒其裳
衣顧吾涉之已深兮愧哲人之見微吾歸甚安無所事
奔旣守吾室又杜吾門一氣孔神于中夜存納至和于
靈根兮挹天醞于元尊旣充溢于幽闕兮亦粹然而見
顏往有坎而茲夷兮昔或危而今安將從化人于西域
兮面藏吏于函關將以一世爲芻狗兮廢與興吾厭觀
彼福禍之一源兮必茲出而茲還彼自以爲無隙兮何

異夫石槨之宋桓歸去來兮吾悲夫斯人不返兮豈招
仙聖與之游昔惠我以好音忽遠去而莫求予曷異于
世人兮初爲哽塞而增憂彼錢罇則深藏兮盍視夫已
墜之田疇萬古芸芸共逝一舟半夜而失旦號其邱畏
達觀之謂予涕已泣而不流悟榮名之取憎兮善斯人
之獲休已矣乎萬物之作各其時吾獨與時而去留豈
或能力而違之旣往莫或追來者尙可期蓋雨暎之在
天豈吾稼之不耔彼蜀雄之必傳作猶愧于書詩嗟身
屈而道伸于斯人兮曷疑

哭下殤

下殤者何吾兒也兒生慧淑父母有所戒輒絕
不爲性仁不傷物處其曹恂恂也年七歲得驚
疾醫之不得其方而死作此以哭之

醫之不得其方耶抑其命有短長耶獨爾能使吾悲若
此耶抑爲父者皆愛其子耶蒼顛夷顙秀眉清目今其
存亡其猶有鬼也使無物則吾復何思其尚有知也則
夫荒屋野寺風霜雨露食息誰汝視也

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

臣王坦修恭校

柯山集卷六

宋

張

耒

撰

五言古詩

休日同宋遐叔詣法雲遇李公擇黃魯直公擇烹
 工賜茗出高麗盤龍墨魯直出近作數詩皆奇絕坐
 中懷无咎有作呈魯直遐叔

休日不造請出遊賢友同城南上人者宴坐花雨中金
 猊散香霧寶鐸韻天風鳥語眞寶相飯香悟眞空尙書
 三二客淨社繼雷宗黃子發錦囊句有造物功握中一

寸煤海外千年松誰降午睡魔賜茗屠團龍鬼子卧城
西咫尺不可逢豈無坐中客終覺少此公歸帽見新月
撲衫暮塵紅困眠有餘想卻聽寺樓鐘

掛虎圖于寢壁示桔椀

畫工出幻事縞素發原藪蕭蕭白茅低凜凜北風走耽
然老於菟舉走安不驟目光炯雙射怒吻呀欲受彼彪
擲其旁文彩淡初就雖然竊形似已足走百獸煩君衛
吾寢振此蓬華陋坐令盜肉鼠不敢窺白晝

神運殿望香爐天池等峰晚宿官廳明日早發

遠公不出山坐受天龍供地祇敢愛寶木石親輪送巖
巖千年屋山立屹不動風雲宿修梁星斗近華棟亭亭
碧香爐薜蔔時自涌五雲巖擁衛天樂下鸞鳳神池閱
寶像光怪發巖洞誰能陟其巔手攬湖龍鞚東堂黃金
藏龍像儼環拱蕭條亡國輦拙樸昔誰用掃堂爲一睡
清極乃無夢思歸成長發結束勤僕從鴻鐘振林莽月
落朝嵐重再往墮渺茫猿鶴應嘲諷

贈張公貴

我昔爲諸生奉書諫議公後來辱稱獎禮數賓客同決

科甫弱冠年少氣如虹歸來陪後乘不責醉後悲孤舟
梁宋郊旅悲卒百窮拜公睢陽府笑語若春風人事不
可期俯仰異吉凶平生丹竈術馬鬣哭新封十年得吾
弟懷舊涕沾胸清貧守家法眉宇肖德容交臂是非外
爲僚兄弟中東軒語長夏葵竹羅青紅西舍雪夜懽玉
顏醉瑤鍾欲飲徑相就三更叱關翁鯨吸絕遺滴山頽
信傾峰搜抉盡醬茹橙梨倒篋籠通宵兩沈醉午起頭
如蓬人生定當爾事去挽驚鴻河梁繫君馬一笑喜相
逢憐君碧紗幌夜淚哭葦叢我方困齏鹽酸寒官辟雖

尚尋舊游地塵壁胷絲蟲啼鳥古寺間夏陰小園空酒
市逢好好琵琶失瓊瓏歌舞一分散賓僚亦西東忘情
猶一歎齊物論非通官冷隱朝市端能信予慵人生當
富貴子盍自磨礪便當隱五車一一貯心胸功就螳作
蛭叢成蛇化龍北郊分袂歸作惡驚兒童長謠代晤語
發子一笑哄

離黃州

扁舟發孤城揮手謝送者山回地勢卷天豁江面瀉中
流望赤壁石腳插水下昏昏烟霧嶺歷歷漁樵舍居夷

實三載隣里通假借別之豈無情老淚爲一酒篙工起
鳴鼓輕艣健于馬聊爲過江宿寂寂樊山夜

宿樊溪

黃州望樊山秀色如可攬扁舟橫江來山脚繫吾纜大
川失洶涌淺水澄可鑿北風吹疎雨夜枕舟屢撼齊安
不可望滅沒孤城暗奔流略溪口龍蜃屢窺瞰平生千
金質戒懼敢忘暫茲遊定何名耿耿有餘念

道士磯

匡廬奠九江苗裔遍南服橫江蔽原野內外實一族危

磯插江生石色擘青玉蛟龍穴亂石猿獾在喬木我行
季冬月江蹟在山腹扁舟如鏡面清淨不可觸躋攀旣
不可千古長幽獨緬想邃古初巢居戒樵牧

離樊口宿巴河遊馬祈寺

扁舟下樊溪江南正清瀉曉登巴河岸極目望春野步
尋修竹寺古木爭偃亞云昔孫仲謀刑牲致師禡雄圖
邈已矣英槩足悲咤石梯造雲霧丹白開廣廈山僧安
寂寞畏冷不出舍勞生遇閒境頓使我心寫晚江平若
席風勢欲相借

龜陵灣阻風三日遙禱孤山而風止

積水多疾風三日阻我舟天寒波濤惡岸窟騰龍虬五
更船篷鳴冷風入衾裯平明諸山雪爛漫鋪琳球篙工
笑相顧拍拍我船頭水魄小孤神霧鬢橫星眸倉卒禱
卽應知我厭滯畱稍晴景物好柳色含新柔春風我故
舊迎我入東州

自離富池凡三禱順濟龍求便風皆獲應又風日
清霽舟行安穩委曲如所欲感而成詩

旗尾指船頭篙工告風便張帆弛雙艣去勢如脫箭船

傍兩高山過目若流電波平船穩駛客寢兀未變吾聞
西江龍神力回寓縣往來萬夫禱正直乃獲願嗟予何
所恃誠確無所薦神豈哀我窮有賜不待獻乃知人窮
我本不坐神譴人間事若異未易以言辯坐令千里遠
近若在几研慙非謝宣城攫筆賦淨練

出山

青山如君子悅我非姿媚相逢一開顏便有論交意今
晨決然去慘若執我袂謂山無見畱此事寧久置道邊
青髮翁下有白玉髓斲之龍蛇窟自足飽吾世平生耽

幽獨乃若忘朝市一官等塵垢安得敗成計草堂醉老子虎溪大開土寄語二主人爲留三畝地

朝雨

幽居感節物僧舍值朝涼空簷落寒雨滴滴響秋堂低
飛林間翮濕羽不能翔危葉別故枝幽花泣晚芳悠悠
清夜眠促織催朝光日月愴已徂吾行獨迷方采采幽
圃蘭歲晚自馨香君子健明德勿爲兒女傷

離陽翟

驅車發潁川回望失嵩少霜氣塞層空黯澹寒日曉原

田際天平百里見飛鳥累累道傍邱石獸卧衰草不知
誰氏碑剝裂偶未倒支離見隸字書帶漢筆妙遺墳不
可問文彩竟何效永年恃金石此計久可笑昔遊已三
歲存歿傷懷抱飽諳人世憂安得身不老

次潁川

許昌古名都氣象良未替客子遠道來塵埃滿襟袂黃
昏造孤驛買飲嚙枯藪庭寬蟾蜍高霜氣徹寒被賴攜
朱提杯可具一飲費無人勸我酌孤獨伴客醉笙簫誰
家樓語笑月中市何人不行樂而我獨涕淚夜長更漏

稀風急鼓輦駛天明卷席去行止隨所值

昭陵六馬唐文皇戰馬也琢石象之立昭陵前客
持石本示予爲賦此

天將剗隋亂帝逢六龍來森然風雲姿颯爽毛骨開
馳不及視山立儼莫回長鳴馳八表擾擾萬鴛駘秦王
龍鳳姿魚鳥不足摧腰間大白羽中物如風雷區區數
豎子縛取如提孩手持掃天帚六合無塵埃艱難濟大
業一一非常材惟時六驥足績與英衛陪功成鏘八鸞
玉輅行天街荒涼昭陵關古石埋蒼苔

同傷十二緱氏寺宿草酌張正民秀才見訪

契濶千里別惻愴難具言殷勤一宵語願子未卽眠空
堂燈火青旅褐借僧氎勞勞一盃酒不解道路寒經年
相從樂旣別亦茫然人間事盡爾聚散亦何歎但悲多
難身尚獲朋友歡間關百憂中一笑有萬錢張子年未
冠已雄羣少年巉巖坐我側紫眸秀雙顴壯志激哀懦
清談破愁煎天明卽分散奈此情悁悁

初到都下供職寄黃九

千里不相見勞勞復何辭不遠一城中耿耿令我思

舍酒家樓推壚卷其旗鼠壤敗晨炊守翁噪羣兒馬傍
挾兩羸雙踵待刻移五日長安塵故山夢中歸何以洗
我心望君青松姿懷情久不吐古屋絃悲詩

次韻魯直夏日齋中

文章慙骯髒談舌罷雋永年來屏百事但願兩耳靜黃
公安禪室不覺在市井客來飽清風可是徒造請犧尊
與社樗妄計幸不幸願君妙觀察金門等雲嶺

晚歸寄无咎二首

雨氣入古屋薄帷生夜清想君擁鼻坐端學苦冷生泥

深欺我馬歸臥日半楹浩然有奇想非子定誰評
屋東雲移山屋西日半壁餘天一劍清遠雨萬絲白官
事癡可了未遭官長責惟應晁夫子不可別頃刻

送呂際秀才南歸

咽咽幽谷泉蕭蕭秋竹風豈不愛孤潔但傷愁且窮呂
子南國秀滄溟貯其胸出試輒不偶低頭避兒童離家
五千里客飯苦不豐冷落臥寒齋苦吟和秋蟲昨者投
我詩九嘆閱未終欲知作者心但視讀者容文章出貧
賤此事古今同但願子富貴不願文日工今日告我別

出門若驚鴻各在天一方何當復相逢

西山寒溪

茲行頗閒暇聊此山水間幸有所攜人臭味同一源杉
 松鳴古刹始覺此溪寒孤亭出屋背石磴相牽攀釋子
 且粗糲雖貧有餘歡午登西山去路作九曲彎山禽慣
 不驚夏木秀且繁緬懷紫髯公奠玉祠天壇豪強有遺
 韻興廢無留觀空崑一泓泉引予掬清甘案此二句一
本作眼明崑
間泉引手
掬清甘至人悲熱惱遺此消昏煩我茶非世間天上
 蒼月團為爾惜不得烹瀹澆晨餐深谷晚易陰快雨時

斑斑但見夾道松龍髯濕蒼顏念我亦閒人屏居閉柴
 關不使任珠玉濟我胸中慳之官亦漫浪遇勝卻盤桓
 平生據頑鈍信命傲憂患言歸徒旅疲就蔭休征鞍卻
 視來時舟一葉繫荒灣

送張天覺使河東席上分題得將字

張侯蜀都秀玉立身堂堂手持明光節六月登太行三
 晉雄中夏朔方臨大荒傳聲賢使者父老相扶將控弦
 百萬戶十年廢耕桑但使把鋤犁自然息桁楊主人延
 閣老別酒泛蘭觴寄聲梁諫議欲試紫參方原注梁欲
寄上黨參

久未
至也

答仲車

先生居山陽時事不挂齒讀書逾五車不肯著一字今
朝苦歎嗟告我將老矣我意與子殊欲去依禪子

和仲車元夜戲述

華燈耀廣陌皎月臨重城惟我二三子柴門通夜扃展
書對明燭濁酒徐徐傾崢嶸千萬慮一醉皆能平

和魯直

濟物非僕僕功名愧無心倚市安能美汲泉不厭深老

人夙有尚鉗鉢好叢林安能紅塵裏徒使老駸駸

書館直舍

紫禁斷人聲蓬山轉春日樓外晚鼓傳城陰衛番出循
除擷新秀紅紫間疎密倚天黃金闕龍虎氣鬱律明時
賦鉛槧寓直守編帙疎閒謝裨補歲月感飄忽謝公山
林賞不爲軒冕屈體道無朝野達情慙利物

宣城至日謁天慶觀行香呈郡僚

溪山慘殘歲况乃值深冬清晨率其屬肆禮凝琳宮漠
漠冒原露淒淒隔水風南方異氣候霜葉未全紅忽憶

稽史筆早趨闢蒼龍拜舞東閣上佳氣鬱葱葱談笑出
右掖交游盡英雄老大心已矣依然魂夢中

秋日獨酌懷榮子邕

新秋一盃酒風雨早涼天眷言西隣友咫尺莫能前豈
無病羸馬泥滑不勝鞭端居何爲者落莫掩書眠高柳
颯已疎碧草留餘鮮衰懷感徂節客舍悲流年孤吟誰
與和獨酌還醒然新晴野路乾期子南山邊

初涼

庭木舞風雨清秋來我堂衾裯偃宵寐燈火照新涼昔

我來清潁庭花有晚芳坐看桐葉暗已近菊枝黃歲月
忽流駛形骸變老蒼淹留應有命通塞詎能量寂歷年
華晚優游永日長憂時非我事黃卷有虛唐

題陸羽祠堂兼寄李援援有詩殊佳二首

陸子不可招寂寥風月魂空堂掩遺像幸此配老禪舉
世人澆薄云誰知子賢竟陵樵牧地陳迹豈復存我欲
歌子詩三歎撫無絃瓦甃薦秋菊酌此石井泉
清詩弔陸子味若堂下泉陸子骨已朽青松代之言松
亦安能言風至時蕭然至談非牙舌陸子意已傳

萬松亭有感

微雨濕青松松間多好風翠光濃欲滴對舞千蛟龍可
惜青玉釵道邊委蒿蓬幽人不汝棄應有綠毛翁

今日

今日寒氣至晨坐進一杯一杯未能已三酌竟空壘我
有曾憶事欲言誰使陪往往中夜歎鬱結無由開賴此
樽中君破悶有後來時時從之遊報我以歡哈古國多
寒肴老妻治炮煨誰云一日富此價萬瓊瑰

摘梅花數枝插小瓶中輒數日不謝吟玩不足形

爲小詩

疎梅插書瓶潔白滋媚好微香悠然起鼻觀默自了秀
色定可憐仙姿寧解老禪翁心土木對此成魔惱

霜後步西園

濃霜失暄妍短日淡無色回風振中園搖落聲策策草
根饑鳥啄飛舞時嘖嘖野荒無遺粒卒歲將何食鮮鮮
西墻下幽草弄寒碧四時不吾欺聊假汝頃刻

冬懷三首

悲笳奏已罷落月在西壁卧聞中林鳥先曉鳴嘖嘖爾

求亦易供固合事安息夜歸陵旦起何爾更勞役乾坤
擾萬物不使輕有獲無求良獨難何以休吾力
揚雄老不遇寂寞玩文史厠身虎狼間乃卒脫其死中
恬遺外慕獨樂異衆喜但有載酒人何用求知已
年來百事懶惟樂靜中趣天寒無來客終日常閉戶進
取乏時才窮通有天數委身付造物已矣隨所遇

感春三首

東風吹桃李花落已滿地搖搖新柳枝薄蔭纔可庇誰
云同一時榮謝兩異意由來何足較要之歸一致

默坐不復出浮雲作朝陰離離簷間花隨雨下故林物
色一如此朱顏坐凋侵自歌陽春曲吾不待知音
午日步四園繁花亂相照天天海棠枝顧我如欲笑殷
紅點輕素含吐皆窈窕持贈東憐子願言論久要

春日雜詩六首

啼鳥喚我覺簷日行且午纍纍出葉鶯庭雀鳴欲乳妻
兒病酒睡雞犬樂其侶風光不我違舍醉何有度
東風入我園花落如急霰感之復攜酒撫樹爲三歎離
離牆間草滿地不可踐陰陽本無情榮謝欲誰怨

春晏百花秀野花無復名悲哉桃李闌念此聊掇英翩
翩雙飛蝶天靜午日晴悲憂浪自若有酒但知傾
堂南老榆柳清陰漸交映飄飄風花乾渥渥雨葉盛鳥
鳴日方遲客去門逾靜自無濟世略耿耿欲誰省
三月行復至青春坐侵尋飛花去寂寂薪葉來駸駸白
日照芳草荒園亂鳴禽朱顏任自老安事累吾心
東風忽無情吹我園中花繁紅與艷紫零落委泥沙鳴
鳥亦何事啾啾竟諠譁須知盛已極委棄欲誰嗟

官閒

官閒吏歸早歲晏寒欲盛槐稀庭日多鳥下人語靜幽
花破寒色過雁驚秋聽酒賤莫厭沾北風行欲勁

秋池

平生落寞意况此秋池側寒水靜無波衰荷委餘碧蕭
蕭動風鬢照影感新白來往雙浴鳧爾生真自得

雜咏三首

隆中臥龍公平昔事耕釣無言顧同儕高視獨長嘯彼
寧惜開口顧爾非同調何事逢玄德曹孫一言料
六槐當我庭春葉密如幄朝來南風起已見菱葉落盛

哀同時來豈必待蕭索鄙哉兒女癡倩倩所樂
鳥鳴高屋上饑顧朝求食擾擾市井人日夜衣食迫豈
伊理當然或者養木得我歌南風詩歸坐還歎息

飛雲

時雨久不施飛雲作朝陰芄芃中原麥賴此三日霖朝
陽忽清霽披露南山岑雖無濟物跡膏澤在民心

和應之燈蛾

萬物皆畏死爾生何獨愚由來附炎熱鮮不喪其軀淺
淺權利客蹉蹉輕薄夫高門甚烈火相勸以奔趨

自黃州至巴河遊靈巖寺觀孫仲謀刑馬壇相傳
權于此刑馬祀江神遂提師伐壽春云

喬木隔塵埃華堂敞深僻人靜好鳥鳴睡餘疎雨滴悲
愁感蕭瑟弔古披荒寂尚溯紫髯翁誓師沉馬壁

雜詩

獨居無與往况此陰雨天起來復何有詩書散我前偃
臥一榻上讀書疲復眠經綸負夙志跌蕩窮吾年

搗藥

指可握而足臂可攘無他何爲勤藥物杆臼日諠譁指

臂何與人正欲使其佳念此慙吝生達人其我嗟

烏白

烏曰強知曉饒饒鳴暗天我事不須早援衾且復眠朝
暉方曠曠慘凜蔽清妍且復待午景負此簷間暄

春林

春林露如雨蕭蕭曉花寒引手攀高紅微香來鼻端何
以比芳潔置之青玉盤持歸供像佛相對淡無言

華月

華月流春宵散我高林影披衣步其下受此掃地靜吾

心方浩然萬境一澄瑩徙倚玉繩低寂寥沈遠聽

離楚夜泊高麗館寄楊克一甥四首

去城未五里夜纜繫衰柳水亭暗風雨人散聞吠狗平
生足羈旅况此還往久有感不自知悽然獨回首

水天夕雲重不雨衣自濕夜寒更士語雞唱舟子急青
黃數宿莽蒼茫曙暈高城亦何有倚檣成獨立

客去水關閉疎燈亦復收川平半夜雨卧冷五更秋扁
舟已寒暑冉冉真乘桴一燈照客睡短夢良悠悠

士師我自出爽邁凌清秋年少不飲酒昏燈夜問囚爾

家外大父聽獄代其憂備饑朝煮飯驅蚊夜張幃獄成
 上府時稽顙呼張侯原注先子治獄郵囚怨心臨縲繼
 相盜以戈矛無令市死厲請帝號重幽

周兆基恭校

柯山集卷七

宋

張

耒

撰

五言古詩

三月小園花已謝獨芍藥盛開

靄靄春日晚寂寂新陰繁千紅與萬紫盛極一時闌西
 螢晚芍藥百夢乘露鮮紅妝諸美人錦繡富春妍東風
 時過之舞態低昂翻折贈懷溱洧感之爲三歎

題焦山

焦山如伏龜萬古浸碧浪舉頭北顧海尾負金刹壯我

聞城東樓秀色日相向松杉數毛髮人物見下上欲攜
浮丘公據殼恣潛漾仙風如見引金闕或可訪

春日雜興四首

桃李用事辰鮮明奪雲綺繁華一朝去默默慙杞梓時
祖鷹化鳩地遷橋爲枳獨有羨門生後天猶不死
昔我遊京室交通五陵間主客各英妙袍馬相追攀千
金具飲噉白金顧吹彈纓弁羅廣席當頭舞交竿鮮妝
耀滌酒錦纈生風灩燈燭暗夜艾士女紛相班歡娛易
徂歇轉盼如飛翮疊疊負孤願離離銜永歎山鳥窺茗

飲簷花笑蔬餐棄捐勿重陳事定須蓋棺

客從遠方來遺我昭華管吹之幻人心異境生虛窾礮
礮青幃橫泱泱春流滿馬蹄交狹斜車轂錯平坦士女
競芳辰禽魚蔭修筇依微認涕笑凌沈見纖短停吹歎
泯滅耽耽復空館靈物信所真顧恨知音罕

潭潭故邑井猗猗上宮蘭不食自清潔莫服更幽閒志
士恥窮極卷迹甘饑寒佳辰邈良覲觸物懸悲端八途
眇回遠經歲曠音翰豈不慕裘馬詭得非所安蟬冕多
休迫繩樞渺憂患枉尋竟何補方枘誠獨難

出長夏門

原注初望龍門

出郭心已清青山忽相對游人傍流水俯仰秀色內誰
張蒼玉屏中斷神斧快清伊瀉其間銀漢曳天派參差
樓觀出杳藹林麓邃巖聲答遠響水影弄空翠同遊得
君子

原注同榮教授

興與烟霞會選勝雖自茲高懷已塵外

飯昭果寺

飄然乘興遊殺酒笑俗具僧居致野飯草草亦有趣山
僧慣迎客煮茗新泉注岩花得春遲晚秀見紅素蕭蕭
野市井人物自來去溪光送孤舟石色照素樹題名掃

高壁歲月記所遇書罷迹已陳出門猶反顧

渡伊水

雙崖若爭妍秀色日相射遊人誇水東揮榜渡清瀉潺
潺溪邊風五月自瀟灑中流望南北河漢自天下嗟予
水鄉客塵土困蹈藉江湖久懷歸無地稅征駕臨流動
長想照影久悲陀滄洲倘有歸功業付高謝

白公祠

斯人不可見千古懷清風猶想鸞鳳姿翛然山水中空
祠遺像儼過者為肅恭同時富貴人泯滅知何窮公惜

得所遇慨然屢輸忠一傷巧舌刀氓默類瘖聾出處竟
無禍卷舒詎知蹤被獲空歎麟不制方爲龍

上皇龕

升危躡石梯已覺毛骨異玄龕剖山腹六月霜雪至佛
臺磨青瑤紺滑不留水巍巍數天人蒼玉刻冠佩老僧
拂高崖上有昔人字國都已蕭瑟山澤隱遺事西軒俯
空濶晝夜納蒼翠卜築莫後時林中有餘地

石樓

清溪若奔虬八鎖束其頸犇騰去莫脫擺掣恣驍猛嘈

嘈戰風霆萬鼓助其勁聲驅石崖動氣抱晴日冷我來
怯初登注視久乃定悠悠山川濶寸目羅萬景平生林
野趣疎放謝鞭警會期山月出一嘯清夜永

上方

足躡青玉磴躋攀不知勞回頭瞰木杪始覺所歷高孤
鳥去滅沒奔溪深怒號白日當畫梁青雲送微颺坐久
神慮平微涼清骨毛但警塵垢容俯仰近亦霄古壁有
遺字昔人嗟寂寥南風不知暑古木常蕭蕭

三龕

萬穴列巖壁三龕獨雄夸封山鑿其骨開像儼且呀悲
哉輕人功不計歲月賒像成竟何補國破荒蓬麻悠悠
清伊水去去滎山斜晚渚栖暝鷗夕波戰餘霞陵谷良
未遷古今如轉車應有千年鶴歸顧如咨嗟

晚飯寶應

晚風吹古栢落照明空山深行得寶刹崖嶺相回環人
遠草木邃境幽魚鳥閒道人掃華堂延我具晚餐齋庖
野菊美石井新泉寒旣飽陟上方浮香出林端平生麋
鹿志强學伏車轅塵懷造勝絕欲去猶三歎

廣化遇雨

浮雲蔽高峰臺殿延晚色風聲轉谷豪雨腳射山白東
樓瞰虛明龍甲排松栢蕭森異人境坐視動神魄撞鐘
寺門掩晚霽尚殘滴相攜下山去塵靜馬無跡歸來解
鞍歇新月如破壁但恐桃花源回舟已青壁

寄子瞻舍人二首

皎皎連城璧實爲天地珍足傷曾不售寶氣終氤氳山
川媚餘秀星斗攬奇氛終然不可掩三浴祓埃塵天王
齋戒受嚴庭具九賓貯之黃金臺藉以九龍茵事稱忘

禮厚人誰駭其新車輪走四方爭覩快一陳無瑕故易
傷斂輝志乃神

紛紛名利場向背不知醜翟公書其門客態自如舊勢
去競詆沮有餘丐升斗高賢少哇眇小子多狀候退之
呼字生房相肆琴叟事奇出意表欲辯不及口神明勞
忠孝福祿日方厚防微無早計求福常恐後

贈楊念三道孚

黃鶴樓前月清輝千里寒娟娟過江北送子別長安長
安百萬家車馬無時閒中天聳觀闕四海會衣冠憐爾

薜蘿子豪華駭新觀蕭蕭囊中句饑坐奏清彈漫郎久
不愜逸思生風翰寄聲武昌魚欲從僧父餐

曉赴秘書省有感

桃李欲開時長安春正好晴空倚閭闔朝日散馳道雲
收龍蛇榜爛爛金碧曉清都不容塵虎士守洒掃家無
常關警襟袂免顛倒何慙驅款段吾事不須早儒生近
卜祝本自異時好聖朝尚文雅詔使窺鴻寶平生一盃
酒江海送吾老靜喧非人事不得守懷抱跳梁干造物
乃取鑊鉞誚委懷隨所遭千葉纔一笑

贈无咎以既見君子云胡不喜爲韻八首

平生懷想人握手良未易接君同舍歡此事非此世十年
淮海夢一笑相逢地投分白首期願言何有既
賢愚譬觀形美醜不自見醫肱待三折劍鐵要百鍊磨
君古青銅汰簡寄明辨一智出千愚食芹敢忘獻
文風還正始磊落有諸君長者進後生亦使我有聞譬
如狸與虎偶使竝稱文終然不可及困我力空勤
文衰東京後特起得韓子支撐誹笑中久乃化而靡籍
湜既洒掃後生始歸市垂君拯溺手請效我一指

詩壇李杜後黃子擅奇勳平生執羈勒開府與參軍舉
詩秉筆徒吟哦謾云云安知握奇律一字有風雲

觸有羸其角進有跋其胡膏車秣吾馬白日在修途雖
乏亡何杯頗多未見書力學致事功良田本深鋤

黃子少年時風流勝春柳中年一鉢飯萬事寒木朽室
有僧對談房無妾持帚此道人人事誰令予獨不

南山縛虎師肯顧世書字揚眉哦楚喉鼎畔倒俟喜詩
聲一蒼蠅下到霹靂耳庸庸老尋常物外有奇偉

昨夜月中一睡殊有秋色覺書所見戲呈道孚

幽人息遙夜四聽市聲寂月華清可掬天色紺欲滴候
蟲先知秋微響出陰壁精瑩高露濕斷續殘河白興懷
我自出抱器方待擇感時當有作陋巷奏金石予方問
農圃朝市嗟掃迹先寒戒裘褐歲暮養老客

東園

荒園何所有落葉與衰叢含芳未肯吐惟有木芙蓉黃
菊如佳人綠萼包金茸併隨重陽酒娛此憔悴翁

次韻淵明飲酒詩

有序

鄙性嗜酒親友所知也紹聖丙子得官明道寓

居宛丘職閒無事終日杜門人知其好飲也或
饋之酒不問寒暑日輒數酌飲雖不多而樂則
有餘因讀淵明飲酒詩竊愛其詞文而慕其放
達因次其韻嗟余與淵明神交于千載之上豈
敢論詩哉直好飲者庶幾耳得詩十一首

我欲常飲酒俗事苦奪之飲酒不得醉何如未飲時顛
倒衆譏笑佳處正在茲念此雖杜門濁醪日常持
出門憚應接俗士不多情對酒輒拜辭好禮以求名嗟
嗟名幾何曷足善爾生共處一泡中倏忽風濤驚好飲

信無補不飲亦何成

我久喜文詞思與鴻鵠飛老來覺非是念昔正可悲買
金鑄杜康白拜誓歸依晉陶與康伯九原吾與歸涉世
若不諳多病身早衰惟有尊中酒不與我心違

處樂非縱情處靜非避喧豪華與枯槁彼各據一偏悠
然獨樂處在我不在山羲皇迹已遠三酌呼可還一罇
每獨睡不待賓客言

所嗜人不得一物百非是猶有尊中酒道勝無敢毀彼
哉譏謗者誑口而信耳當憂十八隔罰此繆語綺

自庇無一椽道人分半宅屋西羅古殞寒草無人跡纍
纍長與少豈復待年百鴉飛朝樹疎蟲弔宵月白平生
或不飲至此方知惜

曹參漢賢相掾吏亦豪英四海付醇酒乃真知物情亡
秦餘毒烈一洗百壺傾和氣薰醉人金革乃不鳴卑卑
談治道陋矣洛陽生

種樹東簷下雨來發幽姿微陽動九地光彩變新枝榮
衰一以異枯槁易神奇消息天使然人工徒爾爲杜門
沾酒飲高懸吾馬羈

里有好事者我往罇輒開我亦爲之盡每往亦開懷尙
慮數見厭動作旬月乖今晨起苦晚獨坐見烏棲冬溫
雪作雨里巷苦多泥且復閉門坐開卷理多諧誰知無
言中獨往不自迷得意復終日弭車不復回

弱歲慕世名中年頗探道世間無非苦病死與生老相
尋無窮已遞代作榮槁奇哉竺乾書百遍讀愈好汙泥
雖云濁本不害吾寶酒雖破淨律吾事在律表

昔嘗罹厄疾一臥輒踰時念無所歸咎乃誓與酒辭那
知偶不死持杯復飲茲旣飲輒爲盡快哉復何疑神暢

病自失此說信不欺藥石傷天和此方吾笑之

與潘仲達二首

東風沛甘雨百物一時好江南桃李盡紅紫到百草道
傍負擔子寒食歸祭禱念我淮上丘三年不躬掃

淮陽牡丹花盛不數京洛姚黃一枝開衆艷氣如削亭
亭風塵表獨立朝萬萼誰知臨老眼更復美葵藿

莎雞

金風透殘伏玉樹先秋涼嚶嚶草間蟲感時振衣裳楚
客思萬里夜吟怨藜牀勞勞終夕語共此簷月光孤輪

曳獨蠶折管韻哀傷辛苦幽父兄無衣畏風霜

宦遊

宦遊吾漫爾未慕致身早秋來憶山苦遙夜夢顛倒鳴
蟲待誰聽落葉煩我掃誰復省勞人吾生常草草

次韻秦觀

琬琰非世珍昔以羊皮換嗟君復何求衆棄乃所玩十
年少游兄閉口受客難二毛纔一第俗子猶憤惋人間
異巧拙善琢貴顏汗嬋娟守重閨倚市爭倩盼君胡寶
滯貨屢辱訪衰憫譬猶仆臥塗更侑觥與散球然瑚璉

質磨琢爭璀璨遲君三年鳴更用驚我慢

阿几

小兒名阿几眉目頗疎明日來書案傍學我讀書聲男
兒事業多何必學讀書自古奇男子往往羞爲儒阿几
笑謂翁薄雲無密雨看翁饑寒姿兒豈合貴富翁家破
篋中惟有書與史教兒不讀書更欲作何事

宿虹縣驛

長隄隘舟車上下無暫歇煎熬古驛門聒聒爭瑣屑東
南淮浙富輸餽日填咽楚風習喧卑吳舌動嘲晰平生

耽靜意投閑劇含噦况茲道路勤強食慰饑渴年來嵩
洛興久與泉石結終當卜吾廬雲山對華髮

有感三首

一春苦多風桃李見無幾夏遊時已失忽忽三月尾中
間亦何有徒自亂心耳所嗟違所娛坐費良日晷堂北
千葉桃微本混榛枳居然未之省一日燦相視零丁不
忍摘攀玩聊自慰乃知物雖微未知卽疎棄從今至零
落猶足伴尊哉仍煩芊綿草藉我花前醉

昨日鴉作巢今日鴉哺兒念知三月闌春物行已稀晚

風颯不收殘紅怨餘姿回風起輕寒擁爐火重吹燈明
夜齋靜目澁臨書遲病齒不飲酒持盃勸妻兒豈無兒
女心惆悵桃李蹊彼昏安目前丈夫方有思

古今不殊途掩卷獨長想炎爐與死灰相去如反掌彼
昏誠不知一醉富莫量那知道傍好曾是厭盃盞一金
短販兒豈暇議得喪但憐反覆間觀者爲惆悵聖賢蹈
大方不苟目前妄寄身愛憎間得失真一餉

食菜

大雨困淋漓小雨傷霖霖哀哉南畝人日夜塗手足入

倉無一粒敢忘祈報福餘功歸老圃畦菜青滿目長官
卻野餽性命赦雞鶩何須問清白薦德芻一束歸來輟
食歎每悔釜炊玉青衫尚如此何況膏梁腹願君少自
寬謀遠須食肉

王子開朝散早年以疾病謝事還江陰求詩爲別
三首

濟物昔所務捨耕還自非駸駸老將至忽忽意多違門
有王夫子柴車謝事歸令人三歎息羞澁向塵衣
田園何日到水國先秋寒興來出飲酒興罷歸杜門漫

郎遊已倦老眼亂丹鉛扁舟肯載我共看雪濤翻
避祿免危疾棄鉛得黃金鬚眉藹如漆便覺老難侵江
湖足幽遜市卒或可尋莫思芙蓉子丹田亂君心
暮春奉女兄弟集宴堂

晨暉麗花柳流水灑池塘暮春漸暄燠華構肅朝涼使
君簿領暇亦復陳壺觴班坐豈異人骨肉皆歡康遙山
出遠翠遠水明斜陽歡言不期醉淡泊味何長

窺園

吾老懶讀書得閒嘗窺園愛此千樹雪高低不勝繁衝

風掠之去頗已隨沙塵感之可奈何我豈土木人畏病
不飲酒已慚嵇阮真淡泊非衆嗜自娛難及賓獨遊還
獨吟魚鳥與我親悠哉山林趣媿此簪纓身

馬巨濟董役魏王墳作詩寄之

城北牛脾山千邱壓其麓事皆有司辦聖世數厚族園
林迫復土百役興甚速煩我別駕公侵星次空谷郵亭
舊客去二刷幾
官皆去閉日睡頗足聞鶯有佳興徙倚近喬木
櫻筍味鼎來管絃調漸熟則歸酌燒酒及此未炎燠

出伏後風雨頓涼有感三首

秋風振秋曉萬境一凄清幽草蟲響息高葉露華凝
戢翼烏尚宿引吭雞屢鳴淹留度華歲悵然難爲情
三伏如湯釜熏煮理亦足西風半夜雨牕戶一清肅那
能惜搖落共喜過炎燠老人亦晨起稍進杯中醪
殘暑扇中盡新涼枕上歸微雲起平遠空碧上朝曦稍
感夏衣薄漸傷高葉稀來鴻飛集喜卒歲稻梁肥

太寧庭栢

微風起清籟烈日交翠陰蔭茲金仙居樓殿鬱沈沈永
日燕雀下有時鐘梵音誰能悟斯道來此契無心

暇日步西園感物輒爲詩得七篇

醑醑

欲知此園古請視醑醑蒼孫枝已輪囷走蔓龍蛇長春
風一吹噓灼灼發奇光仙姝不可挹順風飲其香

秋圃

秋圃寂無有蕭條殘菊枝老蛩依日叫暗蝶傍人飛鎖
澁門開少莎長人到稀舊遊渾記得到處卽如歸

菊叢

下根盤秋泥上葉披宿雨惟餘黃金蕊秀色日夜吐寧

須薦九日但惜歲行暮吾將屑落英持泛蘭臯露

芙蓉

清霜厲嚴殺松柏氣不振芙蓉乃微木晚艷獨嬌春穠
粹覺蘭疲芬敷知菊貧欲攀無所贈聊復插吾巾

橘

奇林蘊貞粹健葉圓青鮮中有碧瑤實正味百果先貢
包登堯俎頌德列騷篇李衡空庸材徒列木奴千

斑竹

重瞳陟方時二妃蓋老人安肯泣路傍洒淚留叢筠頗

疑葛陂化點點留斑鱗慎勿脫水去入世多埃塵

種蔬

貧舍無旨蓄種圃治寒蔬縱橫數席間灌溉亦勤劬積
雨有新甲時摘付中厨何勞樊遲學當問漢陰夫

所居堂後北籬下獲二蛇一小色赤長二尺許一
大色黑長七尺圍四五寸尾可貫百錢盡放之

二物穴我居歲月亦已老一朝雙擒獲蜿蜿出幽草安
行免噬齧敢望吐珠報已月不殺蛇昔賢有遺告

小雨效韋體

午景蔽浮雲芳林散清雨虛牕度遙吹稍覺青葉舉殘
蔬知夏雨隕葉兆秋序幽獨無往來烹茶誰晤語

麻城夏...
 平長...
 臣劉鳳誥恭校

